

四庫全書

史部

欽定四庫全書

浙江通志卷四十五

古蹟

七

紹興府

下

希范亭 名勝志清白堂遺址有清泉一泓上有希
范亭因范仲淹以掘廢井而得泉也

晚對亭 嘉泰會稽志府廨招山閣之東寶慶會稽
續志洪邁建

極覽亭 嘉泰會稽志在府廨賢牧堂之西北淳熙

七年叅政李彥頴建

堵如亭 輿地紀勝即越王臺故址王希呂建

嘉泰會稽

志王信為守改名觀德其西有桃蹊梅塢

秋風亭 寶慶會稽續志在觀風堂側嘉定十五年

汪綱建

汪綱秋風亭柱記秋風亭辛稼軒曾賦詞贈矣人口今廢久矣予即舊基面東為亭

當必有高人勝士如宋玉張翰者來游其間游目騁懷幸為我留毋遽起思歸之興云

多稼亭 寶慶會稽續志在府廨嘉定十年王補之

修

近民亭 嘉泰會稽志臥龍山之西舊有小茅亭名

近民嘉定十五年汪綱即其遺址移越王臺於此

其下為燕春雲根四面屏障步鰲拂雲並汪綱建

望海亭 輿地紀勝在府治臥龍山頂名勝志即今

之越望亭也

寶慶會稽續志望海亭在臥龍之西元微之李紳常賦詩則自唐已有之

矣昔范蠡作飛翼樓以壓強吳此亭即其址也祥符末州將高紳植五桂於亭前易名曰五桂嘉祐中刁約增廣舊址再建復名望海自為記元微之酬周從事望海亭見寄詩年老無流輩行稀足薜

蘿熟時憐水近高處見山多衣袖長堪舞
喉嚨轉解歌不辭狂復醉人世有風波

望仙亭 嘉泰會稽志直使宅之北紹熙甲寅趙侍郎不流建以梅福常隱此故名

海榴亭 萬厯紹興府志郡齋舊有海榴亭因唐李

紳詩著名

李紳海榴亭詩海榴花早開繁蕊光照晴霞破碧烟高近紫霄疑齒齒迎依江

月半嬋娟懷芳不作翻風艷別萼猶含泣露妍搖落舊叢雲水隔不堪行坐數流年

五雲亭 萬厯紹興府志在卧龍東峯宋章岷建

百花亭 隆慶山陰縣志在卧龍之東宋建

拂雲亭 邃亭 趙抃和程給事會稽八咏有拂雲

亭 邃亭

清閔亭 寶慶會稽續志在提刑司疊石為巖洞冠以亭

淥秀亭 冷香亭 逍遙游亭 寶慶會稽續志通

判北廳有小圃頗幽雅嘉定甲戌袁申儒臨池作亭名淥秀又於梅林中作亭名冷香又一亭曰逍遙游因曾子固倅越劉貢父送以詩云君為逍遙

游亭名本此

會稽圖畫亭 寶慶會稽續志在通判北廳卧龍齋
傍盡眺湖山之勝嘉定癸未沈繹作

東亭 嘉泰會稽志府橋北古為餞客之地唐人如

宋攷功輩皆有東亭詩史魏公改築蓬萊館然邦

人猶謂之東亭

宋之問夜飲東亭詩春水鳴大壑
皓月吐層岑岑壑景色佳慰我遠

游心暗芳足幽氣驚樓多衆
音高興南山曲長謠橫素琴

西亭 嘉泰會稽志在州治西北

孫逖宴越府陳法
曹西亭詩公府西

巖下紅亭間白雲雪梅初度臘烟竹稍迎臘水木涵層景簾櫳引霽氛江南逼歸思春雁不堪聞

惠風亭 輿地紀勝在府橋北今為公庫酒肆

光候亭 嘉泰會稽志唐李訥餞崔侍御於此

東武亭 李紳東武亭詩注在鏡湖即元相所建春

秋為競渡之所

嘉泰會稽志世傳龜山自東武飛來因名

白樓亭 水經注重山上有白樓亭亭本在山下縣

令殷朗移置今處

太平寰宇記江夏太守宋輔於山南白樓亭立學教授又沛國

桓儼避地至會稽聞陳業賢候之不見留書繫白樓亭柱而別名勝志常禧門外有白樓亭今地名

白樓堰會稽記云亭
在山陰臨流映壑

柯亭 太平寰宇記千秋亭一名柯亭蔡邕宿此亭

仰觀椽竹知有奇響因取為笛一名高遷亭

於越新編

按舊志以柯
橋寺為亭基

蘭亭 水經注浙江東與蘭谿合湖南有天柱山湖

口有亭號曰蘭亭亦曰蘭上里太守王羲之謝安

兄弟數往造焉太守王廙之移亭在水中晉司空

何無忌之臨郡也起亭於山椒極高盡眺矣亭宇

雖壞基陞尚存太平寰宇記在山陰縣西南二十

七里輿地志云山陰郭西有蘭渚渚有蘭亭王羲

之所謂曲水之勝境

王羲之蘭亭集序永和九年歲在癸丑暮春之初會於會

稽山陰之蘭亭修禊事也羣賢畢至少長咸集此地有崇山峻嶺茂林修竹又有清流激湍映帶左右引以為流觴曲水列坐其次雖無絲竹管絃之盛一觴一詠亦足以暢叙幽情是日也天朗氣清惠風和暢仰觀宇宙之大俯察品類之盛所以游目騁懷足以極視聽之娛信可樂也夫人之相與俯仰一世或取諸懷抱晤言一室之內或因寄所託放浪形骸之外雖趣舍萬殊靜躁不同當其欣於所遇暫得於已快然自足不知老之將至及其所之既倦情隨事遷感慨係之矣向之所欣俯仰

之間以為陳迹猶不能不以之興懷况修短隨化
終期於盡古人云死生亦大矣豈不痛哉每覽昔
人興感之由若合一契未嘗不臨文嗟悼不能喻
之於懷固知一死生為虛誕齊彭殤為妄作後之
視今亦猶今之視昔悲夫故列叙時人錄其所述
雖世殊事異所以興懷其致一也後之覽者亦將
有感於斯文王羲之蘭亭集詩二首代謝鱗次忽
焉以周欣此暮春和氣載柔詠彼舞雩異世同流
乃攜齊契散懷一丘仰視碧天際俯瞰淥水濱寥
間無涯觀寓目理自陳大矣造化工萬殊莫不均
羣籟雖參差適我無非親謝安詩二首伊昔先子
有懷春游契茲言執寄傲林丘森森連領范范原
疇迫霄垂霧凝泉散流相與欣佳節率爾同褰裳
薄雲羅景物微風翼輕航醇醪陶丹府兀若游羲
唐萬殊混一理安復覺彭殤謝萬詩二首肆眺崇
阿寓目高林青蘿翳岫修竹冠岑谷流清響條鼓

鳴音元萼吐潤霏霧成陰司冥卷陰旗句芒舒陽
旌靈液被九區光風扇鮮榮碧林輝翠萼紅葩擢
新莖翔禽撫翰游騰鱗躍清冷孫統詩二首范范
大造萬化齊軌罔悟云同競異標旨平勃運謀黃
綺隱凡我仰希期山期水地主觀山水仰尋幽
人踪迴沼激中達疎竹間修桐因流轉輕觴冷風
飄落松時禽吟長澗萬籟吹連峯孫綽詩二首春
咏登臺亦有臨流懷彼伐木宿此良儔修竹蔭沼
旋瀨縈丘穿池激湍連濫觴舟流風拂枉渚停雲
蔭九皋鶯語吟修竹游鱗戲瀾濤攜筆落雲藻微
言剖纖毫時珍豈不甘忘味在聞韶孫嗣詩望巖
懷逸許臨流想奇莊誰云真風絕千載挹餘芳郁
雲詩溫風起東谷和氣振柔條端坐興遠想薄言
游近郊庾友詩馳心域表寥寥遠邁理感則一冥
然斯會庾蘊詩仰想虛舟說俯歎世上賔朝榮雖
云樂夕斃理自因曹茂之詩時來誰不懷寄散山

欽定四庫全書

浙江通志
卷四十五

林間尚想方外賓迢迢有餘閒華茂詩林榮其鬱
浪激其隈汎汎輕觴載欣載懷桓偉詩至人雖無
懷應物貴有尚宣尼逝沂津蕭然心神王數子各
言志曾生發清唱今我欣斯遊愜情亦暫暢袁嶠
之詩二首人亦有言得意則歡佳賓既臻相與游
盤微音迭咏馥焉若蘭荀齊一致遐想揭竿肆眺
華林茂俯仰晴川渙激水流芳醪豁爾累心散遐
想逸民軌遺音良可玩古人咏舞雩今也同斯歎
王元之詩松竹挺巖崖幽澗激清流消散肆情志
酣暢豁滯幽王凝之詩二首莊浪濠津巢步頽湄
冥心真寄千載同歸烟煴柔風扇熙怡和氣淳駕
言興時游道遙映通津王肅之詩二首在昔暇日
味存林嶺今我斯游神怡心靜嘉會欣時游豁爾
暢心神吟咏曲水瀨淥波轉素鱗王徽之詩二首
散懷山水蕭然忘羈秀薄榮穎疎松龍崖遊羽扇
霄鱗躍清池歸目寄歡心冥二奇先師有冥藏安

用羈世羅未若保冲真齊契箕山阿王渙之詩去
來悠悠子披褐良足欽超跡修獨往真契齊古今
王彬之詩二首丹崖竦立葩藻映林渌水揚波載
浮載沉鮮葩映林薄游鱗戲清渠臨川欣投釣得
意豈在魚王蘊之詩散豁情志暢塵纓忽已捐仰
咏挹餘芳怡情味重淵王豐之詩肆盼巖岫臨泉
濯趾感興魚鳥安居幽時豐駕言映清澗疊疊德音暢
物齊一歡明后欣時豐駕言映清澗疊疊德音暢
蕭蕭遺世難望巖媿脫屣臨川謝揭竿虞說詩神
散宇宙內形浪濠梁津寧暢須臾歡尚想味古人
謝繹詩縱暢任所適回波縈游鱗千載同一朝沐
浴陶清塵徐豐之詩二首俯揮素波仰掇芳蘭尚
想嘉客希風永歎清響擬絲竹班荆對綺疏零觴
飛曲津歡然朱顏舒曹華詩願與達人遊解結遯
濠梁狂吟任所適浪流無何鄉孫綽後序古人以
水喻性有旨哉非以濤之則清淆之則濁邪故

振轡於朝市則充屈之心生閒步於林野則寥落之意興仰瞻羲唐邈然遠矣近咏臺閣顧探增懷聊於曖昧之中期乎瑩拂之道暮春之始禊於南澗之濱高嶺千尋長湖萬頃乃藉芳草鑑清流覽卉物觀魚鳥具類同榮資生咸暢於是和以醇醪齊以達觀快然兀矣焉復覺鵬鷖之二物哉耀靈縱轡急景西邁樂與時去悲亦系之往復推移新故相換今日之迹明復陳矣原詩人之致興諒歌咏之有由文多不載大畧如此所賦詩亦裁而綴之如前四言五言馬西溪叢語蘭亭之會自右軍太傅而次四十二人至唐大厯中朱廸呂謂吳均等三十七人經蘭亭故地聯句有賞是文辭會歡同癸丑年之句

國朝康熙三十四年

聖祖仁皇帝命刑部員外郎宋駿業督工重建

御書蘭亭序刻石立亭上

適南亭 於越新編在山陰縣梅山頂宋熙寧中郡

守程師孟創

陸仙梅山適南亭記會稽山川之秀甲於東南自晉以來高曠宏放之士

多在於此然山川之勝尚有鬱而未發者熙寧十年給事中程公出守是邦有以梅山之勝告公蓋其地昔梅子真之所居也因至其上望之峯巒如列間見層出烟海相值已而於山之高層築亭名曰適南取莊周大鵬圖南之義暇日領賓飲而賞之恍若登蓬萊之上可謂奇矣

鑑湖一曲亭 弘治紹興府志會稽賀監宅後為天

長觀宋御史浩建亭

嘉泰會稽志一曲亭
前競渡不減西園

鏡湖南亭 元微之有宴鏡湖南亭詩

皇甫山亭 嘉泰會稽志孟東野賦皇甫秀才山亭

詩云晴湖瀉峯鏡翠浪開萍蘚唐人多依鏡湖以

為勝

袁秀才林亭 嘉泰會稽志在鏡湖中與方干別墅

相近

方干題越州袁秀才林亭詩清逕林亭指畫
開幽巖別派象天台坐牽蕉葉題詩句醉觸

藤花落酒杯白鳥不歸山裡去紅鱗多自鏡

中來終年此地為吟侶早起尋君薄暮迴

覽勝亭

萬歷紹興府志在柯山上覽全湖之勝

黃猷

吉柯山記亭前則萬峯羅拱其下則重淵澄浸此
於吾越當稱絕勝而方冊不載也張倬柯山覽勝
亭懷古詩維舟鑑湖曲湖水照層巘蒲稗相因依
驚鳬戲平遠白雲天際來松壑怒濤捲一解塵垢
嬰捫陟忘足繭昔賢有遺事亭子久蕪蘚叢桂烟
未消疎篁露猶泣尚餘粉壁書俯仰若在眼富貴
齊嵩嶽愚哲信有辨淒迷謫仙莊惻愴羊公峴撫
景情鬱紆寄言聊自遣尚想化鶴來乘流弄清淺

息柯亭

山陰縣志在塔山東麓上有千峯閣

臨池亭

戴表元臨池亭記右軍祠塾之別築也正

永和修禊處築亭者為東楚湯君屋

懷賀亭 寶慶會稽續志在鑑湖一曲史丞相建

曲水亭 呂祖謙入越錄天章寺蓋王羲之之蘭亭

由右軍書堂百餘步至曲水亭云是羲之鵝池墨

池曲水蜿蜒若蚓必非流觴之舊歲久失其處耳

犬亭 萬厯會稽縣志在犬亭山越王畜犬獵白鹿

以獻吳故曰犬山為犬亭

陽春亭 越絕書山陰故水道出東郭從郡陽春亭

去縣五十里

王子敬山亭

嘉泰會稽志在雲門唐永淳二年春

王勃修禊於此

王勃修禊雲門獻之山亭序觀夫天下四海以宇宙為城池人生百

年用林泉為窟宅雖朝野殊致出處異途莫不擁冠蓋於烟霞披薜蘿於山水况乎山陰舊地王逸少之池亭永興新郊許元度之風月琴堂寥落猶停隱遁之賓釀渚荒涼尚有適逢之客仙舟蕩漾若海山之槎來羽蓋參差似遼東之鶴起或昂昂騁驥或汎汎飛鳬俱安名利之場各得逍遙之地而上屬無為之化下棲元邈之風永淳二年暮春三月修禊事於獻之山亭也遲遲風景出沒媚於郊原片片仙雲遠近生於林薄雜花將發非止桃溪遲鳥亂飛有餘鶯谷王孫春草處處皆青仲統芳園家室並翠於是攜昔酒列芳筵先被禊於長洲却申文而促席良談吐玉長江與斜溪爭流清

歌遠梁白雲將紅塵並落他鄉易感每悽悵於茲
辰駕客河清更歡娛於此日加以今之視昔已非
昔日之歡後之視今豈復今時之會人之情也能
不感乎宜題姓氏以頌懷抱使夫會稽竹箭則推
我於東南崑阜琳瑯亦歸予於西北

溪山奇麗亭

紹興府志在府城東五雲橋跨溪

好泉亭

輿地紀勝在會稽雍熙寺陸少師佃所題

窆石亭

萬厯會稽縣志在禹廟之左

思古亭

嘉泰會稽志會稽山永興公祠之側有茗

鵲淘沙徑思古亭遺址

萬厯會稽縣志在南鎮祠側

越山亭 劉基有越山亭曉望詩

分翠亭 涵虛亭 弘治紹興府志在蕭山縣蕭然

山上靖康元年令曾喜作

望雲亭 心遠亭 適意亭 萬歷蕭山縣志並宋

乾道間邑人徐性建

取石亭 萬歷蕭山縣志梁會稽丞江革在官不納

贈遺及還所乘舟輕易蕩乃取西陵岸石實之後

人構亭於江岸因名

一錢亭 兩浙鹽法志錢清鎮有劉太守祠祀漢劉

寵臨江有一錢亭

麗句亭 名勝志唐詩人秦系所居在蕭山縣之秦

君里

戴叔倫題秦隱君麗句亭詩北人歸欲盡
獨自往蕭山閉戶不曾出詩名滿世間

會景亭 弘治紹興府志在蕭山縣廣慈院後有范

希文葉道卿元厚之沈存中題詠

臨川亭 嘉泰會稽志在蕭山縣

吳越兩山亭 名勝志蕭山北幹山其巔曰玉頂峯

有吳越兩山亭 弘治紹興府志宋景德四年令杜

守一建題曰知稼亭元令尹性修之改今名萬厯

蕭山縣志今為四望臺

貝瓊吳越兩山亭記蕭山尹侯本中築亭於北幹山

巖題曰吳越兩山亭蓋岸江之山凡屬於吳者飛
舞闌楯之外岸海之山凡屬於越者環繞窗戶之
間攢峯疊嶂或起而伏不可具狀攷之紀載越之
始封北至禦兒則錢塘亦越也吳勝越而取之然
吳卒為越禽越卒為楚禽皆不能有其地今侯之
登此亭也豈將覽兩山以寓懷古之思而已耶其
亦觀山之不遷也思固其守思崇其業思溥其澤
於民其庶幾乎陸天錫吳越兩山亭詩幹山孤亭
據磐石老我凭高興無極長松叅天凝黛色空翠
滿山如雨滴長江中斷海門闊兩岸遠峰排劍戟

或蟠臥龍形或鼓丹鳳翼仙乘縹緲東海東徐福樓船竟何益採藥人已陳鞭玉土有赤四海混一車書同形勝何須限南北吁嗟霸業今誰在吳山越山長不改

芝亭 弘治紹興府志諸暨芝山坊唐令郭密之作

龜山亭 紹興府志在諸暨縣放生湖郭密之建

浣溪亭

於越新編在諸暨縣浣溪

黃潛浣溪亭詩巧笑回頭異態

生明珠論斗比猶輕山園故堞青蘿色水涵寒灘白
汀聲十萬甲兵寧畏敵尋常花草特傾城歸來便作興亡鑒乞與陶朱一舸行

芝泉亭

諸暨縣志在孝感山唐張萬和廬墓之所

句無亭 萬厯紹興府志國語曰句踐之地南至句
無今諸暨有句無亭

釣隱亭 名勝志在餘姚縣秘圖山麓以嚴徵君名

嘉靖餘姚縣志當翠竇秀野
兩亭之中北可望客星山

雩咏亭 於越新編在餘姚秘圖湖北元越帥劉仁

本建

劉仁本雩咏亭序至正庚子仁本治師餘姚
乃相龍泉之左麓州署之後山得神禹秘圖

之處水出巖罅潄為方沼疏為流泉卉木叢茂行
列紫薇間以竹篁彷彿乎蘭亭景狀因作雩咏亭
以表之合甌越之士得四十二人同修禊事
因曰續蘭亭會云於越新編即翠竇亭故址

噴珠亭 於越新編餘姚查湖有噴珠池宋元嘉中
李信構亭其間遺址尚存

更好亭 於越新編在餘姚龍泉寺後宋高宗常登
此望風物曰更好云

橘亭 蘇伯衡橘亭對越士陸孟文家於姚江之上
歷山之下治圃蒔橘構亭

龍泉亭 喚仙亭 嘉靖餘姚縣志在龍泉山龍泉
寺後自山麓至絕頂背山面水為一邑佳處

千巖勝槩亭 萬厯上虞縣志宋令袁君儒於縣圃

垵垣上建亭

照心亭 萬厯上虞縣志在尉廨射圃尉方申伯建

觀風亭 萬厯上虞縣志在縣治西臨河淳祐中令

魏珉建今為水館亭

仇亭 水經注上虞江有仇亭在縣東北一十里

萬厯

上虞縣志今北鄉有柯山溝疑即仇亭遺址

適越亭 萬厯上虞縣志在晝錦門外宋寶祐中令

趙時徵建

雙檜亭 寶慶會稽續志在上虞曹娥廟

會稽縣志其上雙檜

甚古

虛籟亭 弘治紹興府志在上虞縣宋杜思恭建

一覽亭 萬厯上虞縣志在長者山之椒元張興創

以眺四山之勝

楊亭 萬厯紹興府志吳黃門楊哀明居嵯縣弘訓

里開瀆作埭埭之西作亭亭埭皆以楊名

戴溪亭

嘉泰會稽志在嵊縣剡溪晉王子猷居山

陰夜雪初霽忽憶戴逵時在剡便乘小舟詣之造

門不前而退今人稱為戴溪邑令姜仲開建戴溪

亭後改興盡今復其故

王銍題戴溪亭詩碧玉仙壺表裏清我來閒伴白雲

行四山迤邐青圍野一水蜿蜒綠遠城試問春來
觀秀色何如雨後聽寒聲昔人已寓烟霞外落日
空含萬

古情

嘯猿亭

弘治嵊縣志在東白山褚伯玉建

天香亭

王十朋天香亭記汝南周君汝能堯夫得

爽塏於剡山之陽挾雙溪之勝有巖桂蒼然成林
而亭乎其中真剡中絕景也

星峯亭 嵯縣志在星子峰上每逢重九邦人多登
眺其上宋建

宴休亭 弘治紹興府志在新昌治元令完顏從忠
建

放鶴亭 輿地紀勝在新昌縣沃州山
沃州山西北有支遁嶺即

支遁放
鶴處

愛山亭 紹興府志在新昌孟塘山宋尚書黃度娛
親之所自為記

濯纓亭 成化新昌縣志石城山有夾溪塘循塘而

行有白鷗塢濯纓亭未詳所建

新昌縣志
朱文公建

牧坡草亭 萬厯新昌縣志在珠浦元呂不用建

飛翼樓 太平寰宇記按越城記六樓八門并四水

門共十二門樓飛翼最高

沈立越州圖序飛翼樓
高十五丈范梈所築以

雁強吳也飛翼一作龍翼興地紀勝今望海亭是
其故址世號鼓吹樓唐庚登越王樓詩左綿城北

長安道馬足翩翩人自老
越王高樓藏道邊道上
行人迷不到樓前
西日墮江紅一見如逢隣舍翁
向來何處識面目
應在杜陵詩句中

新樓 於越新編在使宅
南白居易有和元微之新

樓北園偶集詩

李紳新樓詩戎容罷引旌旗卷朱戶塞開雉堞高山聳翠微連郡閣

地臨滄海接靈鷲坐疑許宅驅雞犬笑類樊妻
化羽毛惆悵柱枝零落促莫思方朔種仙桃

北樓 李紳有北樓櫻桃花詩

望雲樓 晏公類要在州東怪山上即句踐游臺

披雲樓 寶慶會稽續志府廨有披雲望雲二樓俱

唐時建

唐詩云樓詩元和文物盛羣賢曾借蓬萊住列仙畫入簾櫳烟外寺鐵搖臺榭水

中

滿桂樓

杜鵑樓

寶慶會稽續志在府廨俱唐建

其跡已不可攷

李紳滿桂樓詩并序架樓城西南臨眺於外盡見湖山別開外扉通

杜鵑樓不啟重扇清夜可以閑宴因以滿桂為名也為憐湖水通宵望不學樊川却月樓惟待素規澄滿鏡莫看纖魄挂如鉤卷簾方影侵紅燭繞竹斜暉透碧流蕭瑟晚風聞木落此時何異洞庭秋又杜鵑樓詩并序七年冬所造自西軒延架城隅樓前植杜鵑因為名杜鵑如火千房拆丹檻低看晚景中繁艷向人啼宿露落英飄砌怨春風早梅肯待佳人折好月誰將老子同惟有此花隨越

鳥一聲啼

處滿山紅

和旨樓 西溪叢語紹興臨街酒樓翟公遜為郡作

西樓 萬歷紹興府志舊記云在山陰縣西

孫遜題山陰縣

西樓詩都邑西樓芳樹間逶迤霽色繞江山山月夜從公署出江雲晚對訟庭還誰知春色朝朝好二月飛花滿江草一見湖邊楊柳風遙憶青青洛陽道

望秦樓 見趙抃和程給事會稽八咏

修竹樓 於越新編在會稽宋王英孫監簿所構對

秦望山

林德賜修竹樓詩秦望諸峯入几看仙居縹緲五雲端天高地迥三千界月白風清

十二闌碧海氣侵珠珮濕明河影落王蕭
寒超然身在鴻濛上何必蓬萊跨紫鸞

高遷樓 太平寰宇記蕭山縣有高遷樓吳志云孫
策入都都人迎策於高遷

聽潮樓 客越志在蕭山縣

望烟樓 諸暨縣志在四十一都宋黃振每日登樓
望村中有未舉炊者往送之糧鄉人德之因名

舜江樓 嘉靖餘姚縣志在縣署譙門之南

瑞雲樓 餘姚縣志在龍泉山北王文成所生之處

艤雲樓

紹興府志在嵯縣東曦門外下俯清流前

對疊嶂宋嘉定八年令史安之建

花光水色樓

嵯縣志在金庭香爐峰之麓

艤雪樓

弘治紹興府志在嵯縣北明心寺東麓宋

翰林學士高文虎建

張氏藏書樓

紹興府志在嵯縣西清化鄉元處士

張鑰建

黃潛題張氏藏書樓詩木杪出飛樓仙山在上頭可能無客至少為借書留芸草春

仍長虹光夜不收何如
試乘興一棹剡中舟

來青樓 於越新編在新昌縣東宋叅軍呂嵒建

紹興

府志元末劉伯溫
呂不用讀書於此

蓬萊閣 名勝志在州治設廳之後吳越錢王所建

舊記云蓬萊山正偶會稽

寶慶會稽續志蓬萊閣在設廳後臥龍山下章

棗作蓬萊閣詩序云不知誰氏創始按閣乃吳越
錢鏐所建棗偶不知爾淳熙元年其八世孫端禮
重修乃特揭於梁間云定亂安國功臣鎮東鎮海
兩軍節度使檢校太師侍中兼中書令食邑一萬
戶實封六百戶越王鏐建其名以蓬萊者蓋因元
微之詩而始得名也自元祐戊辰章棗修之又八
十七年錢端禮再修又四十八年汪綱復修元稹
以州宅夸於樂天詩州城迴繞拂雲堆鏡水稽山

滿眼來四面常時對屏障一家終日在樓臺星河
似向簷前落鼓角驚從地底回我是玉皇香案吏
謫居猶得住蓬萊張景修州宅蓬萊閣詩萬疊湖
山烟水濱朱門盡戰間松筠登臨不踏紅塵路燕
景長居紫府春晝靜欲驂風外駕夜寒疑是
月中身我慚白首方懷紱猶得蓬萊作主人

秦望閣 寶慶會稽續志府廨常衙廳之上為秦望
閣不知作於何時趙抃嘗有詩熙寧前已有之矣

清涼閣 寶慶會稽續志在府廨棣萼堂下守洪邁

重修改為招山閣

弘治紹興府志閣後廊廡
名雲近廊宋守趙彥倓建

延桂閣 於越新編在府署清思堂側宋守趙彥倓

建

競秀閣 王十朋有州宅競秀閣詩

曲水閣 弘治紹興府志在府廨

王十朋曲水閣詩
王謝蘭亭久寂寥

茂林修竹自蕭條
蔣侯近代風流守曲水
流觴意亦高注太守蔣堂建今為飛蓋堂

稽山閣 輿地紀勝在府治臥龍山東隅

寶慶會稽
續志有程

大昌賦刻

於梁間

鎮東閣 名勝志在府治左即舊子城之鎮東門

萬厯

紹興府志宋元

以來名鎮東閣

臨書閣 嘉泰會稽志會稽縣雲門寺有永禪師臨
書閣人來乞書戶限為穿用鐵裹之號鐵門限

松風閣 戴表元松風閣記山陰王德玉居州城之
東隅因臺池之秀林丘之勝橫俯之以為閣而名
之以松風

高風閣 嘉泰會稽志在餘姚縣廨令李祺壽建後
吳興施宿知縣事重新之據秘圖山之麓前對南
山為一邑佳處閣下為嚴公堂釣隱亭嚴光墓在

其北也

秘圖閣 嘉靖餘姚縣志在秘圖山麓下瞰秘湖已
乃改為翠靄亭

中天閣 紹興府志在餘姚龍泉山王陽明聚講處
四山閣 剡錄縣治公廳相直有四山閣

齊雲閣 剡錄在西白山南齊褚伯王建

凝香閣 弘治紹興府志在新昌縣治元令完顏從

忠建

傳心閣 成化新昌縣志在石溪義孰張南軒為銘

朱文公跋

議善閣 嘉泰會稽志在新昌縣石待旦於萬卷堂

傍又置議善閣占山水之勝

越王臺 萬歷紹興府志舊在種山東北今在臥龍

山之西嘉定十五年汪綱因小節亭基址為之為

一郡登覽之勝曾者年篆三大字刻於石

名勝志
蕭山西

陵亦有越王臺李曰詩西陵拱越臺是也實翠南
遊感興詩來游欲問前朝事惟見江流去不回日

暮東風春草綠鷗
鵠飛上越王臺

望月臺 寶慶會稽續志府廨舊有望月臺汪綱建

王十朋望月臺詩明珠進吐臥龍頭漸覺清光
萬里浮人望使君如望月要須如鏡莫如鉤

虞舜巡狩臺 述異記會稽山有虞舜巡狩臺

望鳥臺 拾遺記越王入吳有丹鳥夾王而飛故其

霸也起望鳥臺以表瑞

紹興府志今溫泉鄉鏡
湖旁山有望湖臺舊址

陶朱公釣臺 十道志在會稽縣南

降仙臺 會稽三賦注皇覽云宛委山上有巨石如

臺號曰降仙臺苗龍仙人於此上升

呼鷹臺 於越新編在會稽石姥山相傳有異人登巖呼鷹即下

拜郊臺 諸暨縣志吳越武肅王建在大部義安二鄉界

靈女臺 嘉泰會稽志在諸暨縣東北

弘治紹興府志在仙姑廟

側

倚杖臺 會仙臺 諸暨縣志在五洩山

王弘之釣臺 萬厯紹興府志在上虞蘭莚山上虞
江有三石頭弘之垂釣於此

任公子釣臺 嘉泰會稽志新昌縣南巖世傳任公

子釣魚之所一云在稽山門外

齊顓題南巖南巖寺本滄海任公釣

臺也今巖側尚有任公
釣車石棺蛇骨存焉

吹笙臺 弘治紹興府志在嵊縣治宋建

孔愉宅 水經注侯山孤立長湖中晉車騎將軍孔

敬康少時棲迹此山

嘉泰會稽志孔愉封餘不亭
侯為會稽三年營山陰湖南

侯山下數畝地為宅山初無名以
愉來居故名侯山今為小隱山園

許詢宅 輿地紀勝舊宅在山陰今為能仁寺新宅

在永興太平寰宇紀會稽縣許君里在清風坊晉

徵士許詢之故宅

嘉泰會稽志詢父畋從元帝過
江遷會稽內史因居焉詢隱居

不仕東晉咸和六年捨山陰永興二宅為寺穆帝
時名山陰舊宅曰祇園今為能仁寺永興新宅曰
崇化縣西南四十里有慈雲寺縣西九十里有重
興院皆詢嘗所居也郡國志云會稽山南有許君
宅又許君里在會稽縣清風坊按皇甫冉詩云昔
聞元度宅門對會稽峯者謂山陰宅也王勃山亭
序云永興新郊許元度
之風月者謂永興宅也

王羲之別業 嘉泰會稽志在山陰縣東北六里舊

傳戒珠寺是也舊經云羲之別業有養鵝池洗硯

池題扇橋存焉

紹興府志在山陰者為右軍別業其宅則在嵯縣朱熹游戒珠寺悼

右軍故宅詩因山盛啓浮屠舍遺像仍留內史祠筆塚近應為塔塚墨池今已化蓮池書樓觀在人隨遠蘭渚亭存世幾移數紙黃庭誰不重退之猶笑博鵝時

江彪宅 太平寰宇記山陰郭北有江橋晉江彪居

此

嘉泰會稽志江樛傳云樛於會稽龍華寺製修心賦云晉護軍將軍彪昔蒞此邦卜居山陰都

陽里寺域則宅之舊基左江右湖面山背經東西連跨南北紆紫寢處風雲憑樓水月按晉書江彪

傳永和中嘗為護軍將軍出補會稽內史當即彪也按江橋因彪而名今郡人乃以為江文通故居

施肩吾宅 弘治紹興府志在山陰

陳堯佐過施肩吾故宅詩幽居

正想淩霞客夜久月寒珠露滴千年獨鶴雨三聲飛下巖前一株柏

嚴維宅 嘉泰會稽志嚴長史維宅唐大厯中鄭槩

裴冕等聯句賦詩與長史凡六人長史句云落木

泰山近衡門鏡水通以詩攷之可想見其處矣

山陰

縣志在縣北長史村又云在鑑湖皇甫冉秋夜宿

嚴維宅詩昔聞元度宅門對會稽峯君住東湖下

清風繼舊蹤秋深臨水月夜半隔

山鐘世故多離別良宵詎可逢

秦系宅 於越新編秦隱君系所居在會稽若耶溪

上

秦系將移耶溪舊居留贈嚴維詩雞犬魚舟裏
長謹任興行那邀落日醉已被遠山迎書笈將

非重荷衣著甚輕謝安
無箇事忽起為蒼生

朱山人別業 萬厯紹興府志在山陰縣南

劉長卿
送朱山

人歸山陰別業詩越州初罷戰江上送歸橈南渡
無來客西陵自落潮空城垂故柳舊業廢春苗閭
里相逢夕鶯
花共寂寥

唐翊宅 弘治紹興府志在府城新河坊翊宣和中

鴻臚少卿

陸游宅 山陰縣志宋寶謨閣待制陸游所居在三

山地名西村游自著居室記

於越新編三山在府城西九里鑑湖中與

徐瓶鼎峙陸游所居陸游懷鏡湖故廬詩臨水依山偶占家數間茆屋半歌斜雲邊腰谷入秦望雨外舞簑歸若耶從宦只思乘下澤對人常悔讀南華病來更怯還鄉夢頻嚮簾泉試露芽

謹按劍南詩集有以風月名小軒詩有漁隱堂獨坐詩有北園雜詠詩有新築龜堂詩有新葺東軒詩有小葺東園詩有晨起至參倚齋示子聿詩有南堂夜興詩有老學菴北作假山詩有魯墟詩自注先太傳舊宅有道室詩自注予道室以還嬰名之是皆宅中名也特拈出之

全后宅 名勝志會稽迎恩門外宋理宗母全后家

也理宗童時育於母宅

萬厯紹興府志山陰浴龍宮在迎恩門外虹橋理宗

童時與弟與芮浴於河余天錫夢龍負舟即此地

鄭弘宅

水經注寒溪之北有鄭公泉漢太尉鄭弘

宿居潭側

太平寰宇記鄭弘所居在會稽縣若耶溪東

陳囂宅

嘉泰會稽志漢太中大夫陳囂宅在禮遜

坊去會稽縣東二里初囂與紀伯為隣伯竊囂藩

地自益囂益徙地與之伯慚懼歸所侵地其中乃

為大路鴻嘉二年太守周君刻石旌表號曰義里長

簷路

鍾離意宅

嘉泰會稽志府城東會稽地有鍾離橋

漢鍾離意仕至尚書僕射此其所居

王獻之宅

嘉泰會稽志在會稽縣南三十里晉義

熙三年有五色祥雲見安帝詔建雲門寺

何充宅

嘉泰會稽志在會稽縣東南七十里充嘗

為會稽內史居此今福慶寺乃其舊宅

郭偉宅

嘉泰會稽志晉驃騎大將軍郭偉宅在會

稽縣東南大禹跡寺是也

謝敷宅 嘉泰會稽志在會稽五雲門外一里或云

在雲門寺東唐僧靈一詩春山子敬宅古木謝敷

家又宋攷功雲門詩樵徑謝村北學井何巖東是

也

太平寰宇記餘姚縣南有四明山
高峰峽雲連岫蔽日即謝敷居所

何子平宅 紹興府志在會稽東土鄉劉宋何子平

仕為海虞令有孝行

何允宅 名勝志齊何允仕至中書令後棄官隱會

稽若耶山雲門寺後以逼隘不容學徒遂遷秦望

起學舍即林成園因巖為堵

嘉泰會稽志 衡陽王元簡守會稽時山發

洪水漂拔樹木此室獨存元簡令鍾磬作瑞室頌以旌美之

江淹宅 太平寰宇記在會稽縣招賢坊

嘉泰會稽志宅在招

賢坊又蕭山縣東北一百三十步有江淹故宅今為覺苑寺寺前有夢筆驛亦以文通得名按文通城中已有宅蕭山者殆別墅也

謹按江淹故宅在山會者由江彪而訛也在蕭山者由江總而訛也但諸志相沿已久姑錄之

陶弘景宅

於越新編會稽縣陶晏嶺陶弘景隱此

賀知章宅 嘉泰會稽志唐賀秘監宅在會稽縣東北三里八十步後以宅為千秋觀

徐浩宅 嘉泰會稽志在會稽縣五雲橋之東有遺址存溪山奇麗過者猶屬目焉

張志和宅 嘉泰會稽志元真子張志和隱居在郡之東郭唐大厯中觀察使陳少游往見為終日留表其居曰元真坊以門隘為買地大其闕號曰回

車巷

東陽志志和本名龜齡金華人兄鶴齡亦有文學恐志和浪迹不返乃於會稽東郭買地

結茅以居之一閑
竹門十年不出

方干宅 弘治紹興府志會稽縣澄波坊方干所居

華氏攷古雄飛門巷雖改
故池未湮名曰方干池

齊唐宅 會稽三賦注少微山在五雲門外職方員

外郎齊唐所居

寶慶會稽續志唐天聖八年進士
致仕後家於鑑湖顧臨職方集序

鑑湖東北有山巋然公親率箕畚栽培其上而闢
其下為寢疏泉治植花卉為園與湖之西南會稽
禹祠相望為山水奇偉之
觀自名其山曰少微山

趙宗萬宅 嘉泰會稽志在會稽縣東南照水坊宗

萬字仲淵祥符中被召不赴求為道士即其家賜羽衣以遂其志嘗有詩云斗懸金印心難動屏列春山眼暫開蓋自述也

張復初宅 萬厯蕭山縣志宋理宗勅建駙馬張復初宅號張家府

范蠡宅 於越新編在諸暨長山側今為翠峯寺處

厚諸暨淨觀院碑陶朱公俗傳諸暨人今淨觀院其故居也鄉曰陶朱井曰鷓夷張嬪經范蠡舊居詩一變姓名離百越越城猶在范家無他人不見扁舟意却笑輕生汎五湖

西施宅 太平寰宇記諸暨縣巫里句踐得西施之

所

萬歷蕭山縣志縣南有苧蘿山屬苧蘿鄉山下有西施宅上有紅粉石

于吉宅 弘治紹興府志諸暨縣干溪吳方士于吉

所居

楊維禎宅 名勝志諸暨縣烏苧山有鐵崖崖石如

鐵元末楊廉夫世居於此因以鐵崖為號

虞國宅 嘉泰會稽志漢日南太守虞國宅按輿地

志云餘姚縣西有嶼山山南有虞國宅國在日南

愛及民物出有雙雁隨軒秩滿還家雁與偕至其宅今為百官倉

黃昌宅 弘治紹興府志漢大司農黃昌宅在餘姚黃橋南

郝悖宅 名勝志虞國別墅在餘姚羅壁山洛陽人云巖囿大勢具體金谷郝太尉悖遍遊諸境棲情此地後以司空臨郡遂卜宅居之

虞翻宅 嘉泰會稽志在餘姚縣靈緒山會稽記云

昔虞翻嘗登此山望四郊誡子孫曰可留江北居
後世祿位當過於我聲名不及爾然相繼代興居
江南必不昌今諸虞氏由此悉居江北也

賀循宅 於越新編賀墅在雲棲鄉晉賀循所居

全卷

賀墅詩深村車馬驚鸞鶴散騎蒨堂見杜
蘭水玉自甘山水味漫勞甲第賜長安

虞世南宅 宋元禧虞家城舊宅記餘姚梅川鄉有
虞家城相傳為虞世南宅基按會稽記云虞國宅
在嶼山南而世南宅基在梅川鄉人自其盛者傳

之但知國宅不知永興嘗居是鄉耳

王冕宅 弘治紹興府志冕諸暨人隱餘姚九里山
種梅千樹自題為梅花屋

孟嘗宅 嘉泰會稽志漢合浦太守孟嘗宅在上虞
縣南有孟宅橋又縣東有還珠門取合浦還珠之
義

謝安宅 嘉泰會稽志謝安本傳云安寓居會稽與
王羲之及高陽許詢桑門支遁遊處相傳今上虞

縣西南五十四里國慶寺乃太傅舊居山上有東

西二眺亭

寶慶會稽續志上虞東山大靖故居也絕頂有謝公調馬路白雲明月二堂遺

址嘉泰會稽志東山因太傅而名者三一在臨安一在金陵非故居之東山也惟始寧東山乃其故居其證甚明世說王羲之與劉侯曰若安石東山志立當與天下共推之注引續晉陽秋曰安石家於會稽上虞縣優游山林六七年間徵召不至雖彈奏相屬繼以禁錮晏然不屑也自咸康初辟召不起高臥歷年所以放情丘壑正在此山自東漢末析上虞之始寧鄉為始寧縣東晉有上虞始寧二邑陽秋所載得其實矣

謝元宅 水經注太康湖晉車騎將軍謝元田居所

在右濱長江左傍連山平陵修通澄湖遠鏡於江
曲起樓樓側悉是桐梓居民號為桐亭樓盡升眺
之趣蘆人漁子汎濫滿焉湖中築路東出趣山路
甚平直山有三精舍高聳凌雲垂簷帶空俯眺平
烟杳然在下水陸寧晏足為避地之鄉矣

嘉泰會
稽志上

虞江有琵琶圻臨江有石林名釣魚臺
為謝元所居之地田居當是舊居之說

孫綽宅 孫綽遂初賦序經始東山建五畝之宅

世說

孫綽賦遂初築室畝川自言止足之
分齋前種一株松柏手自壅治之

葛洪宅 水經序三石頭丹陽葛洪遜世居之基并
存焉

魏伯陽宅 名勝志上虞縣南百樓山魏伯陽居之
周元吉宅 萬厯上虞縣志自金壘而南曰長者山
宋周元吉所居嘗賑突不烟者鄉人德之因名

戴逵宅 嘉泰會稽志戴公舊居剡中郗超每聞欲
高尚隱退者輒為辦百萬資并為造立居宇在剡
為戴起宅甚精整戴始往舊居與所親書曰近至

剡如官舍事見世說

弘治懷縣志在剡源鄉有戴溪後徙桃源鄉其村多戴姓

號戴村其遺氏也又孝節鄉有剡業遺址其地稱遺溪

王羲之宅 剡錄在金庭山其子孫世居金庭之側

裴通王右軍故宅記越中山水奇麗剡為最剡中
山水奇麗金庭洞天為最洞在縣東南循山趾右
去得小香爐峯峯在洞天北門谷抱山圍雲重烟
密花光照夜而常晝水色含空而無底真天下絕
境也是以瑯邪王羲之家於此山書樓墨治舊制
猶在至南齊道士褚伯玉於此山置金庭觀正當
右軍之家書樓在觀之西北墨池在殿之東北處
所遐深風景秀異即所謂赤城丹霞第六洞天者
也通以元和二年三月與二三道友襄履而游登
書樓臨墨池但見山水之異其險如崩其聳如騰

其引如肱其多如朋不四三層而謂天可昇再宿而還以書樓闕壞墨池荒毀語於邑宰王公徵王氏子孫之在者理荒補闕使其不朽即題茲實錄而已

阮裕宅

剡錄裕居會稽剡山志存肥遯

朱放宅

剡錄放隱於剡溪徵辟皆不就

張嵎宅

弘治嵎縣志在桃源鄉為梁侍中開府儀

同三司諡忠貞張嵎遺址

王緒宅

弘治嵎縣志唐王緒居剡一曰王公別業

皇甫冉送王緒還剡中別業詩不見關山去何時剡中已聞成竹木更道長兒童離落雲常聚村

墟水自通朝朝憶
元度非是對清風

袁稠宅

弘治嵯縣志在剡溪

李端寄袁稠詩花洞晚陰陰仙壇隔杏林

漱泉春谷冷搗藥夜窗深石上開仙酌
松間對玉琴戴家溪北住雪後去相尋

吳處士宅

弘治嵯縣志在溪嶼

賈島憶吳處士詩
半夜長安雨燈前

越客吟孤舟行一月萬水與千岑島嶼夏雲
起汀洲芳草深何當折松葉拂石剡溪陰

阮肇宅

寶慶會稽續志嵯縣南十里阮仙翁廟阮

肇故宅也

王十朋阮仙舊宅詩再入山中去烟霞鎖翠微故鄉遺宅在何日更來歸

姚舜明宅

弘治嵯縣志在永富鄉為宋太師開國

男姚舜明遺址

李易宅 弘治崧縣志在貴門里宋給事李易當宋末隱於剡中初寓獨秀山下有卜築詩

王銍宅 弘治崧縣志在靈芝鄉銍忤賈似道去職

居剡自號雪溪居士

王銍自題幽居詩我家住在剡溪曲萬壑千巖看不足却

笑當年訪戴人扁舟一夜去何速

鳳林 華氏攷古在五雲門外世傳禹受圖籍時游其庭鸞結其巢鳳凰鳴飛依於林木

南林 吳越春秋范蠡在越處女善劍隱於南林

嘉泰

會稽志南林

在山陰縣南

雁田 晏公類要夏禹與諸侯樂於此聖人之化感

於鳥獸故其地雁為田春披草根秋除其穗

名勝志禹

廟下有鳥田吳越春秋云天美禹德使百鳥還為民田是也

采蓮田 萬厯會稽縣志若耶山下有采蓮田

都護門 太平寰宇記在會稽縣南二里晉中將軍

王恬為會稽內史成帝問曰與誰同行恬曰將弟

蒼偕帝欲見之蒼未有官於時法白衣不得見天子因拜為都尉至郡別開此門出入時人貴之因

以官為號

名勝志督護門一作都督今失其處豈即都賜門耶

雷門 太平寰宇記句踐所立以吳有蛇門得雷而發以表事吳之意

嘉泰會稽志雷門上有大鼓圓二丈八尺聲聞洛陽孫恩之亂

軍人斫破有雙白鶴飛出

雙闕 山陰縣志在北門外闕外百步即雷門

麋苑 名勝志會稽縣白鹿山謂之鹿野按吳越春

秋乃越之麋苑也

防塢 越絕書防塢越所以遏吳軍也

朱室 水經注句踐百里之封西至朱室

嘉泰會稽志朱室今

為朱室塢又謂在
浙江西岸未詳

古冶 嘉泰會稽志在州東南越王鑄劍之所

越大市 萬厯紹興府志在郡城都亭橋秦漢時越人於此為市即蘄子訓賣藥處

筆倉 輿地紀勝在會稽顯聖院有王子敬筆倉今

一智井

陽明洞天 嘉泰會稽志在會稽縣宛委山洞外飛
來石下為禹穴傳云禹藏書處

鏡湖一曲 太平寰宇記唐元宗朝秘書監賀知章

乞為道士還鄉勅賜鏡湖一曲

嘉泰會稽志賀知章始求周宮湖數

頃詔賜鏡湖鄉川一曲著舊謂今東城南望為賀家湖疑即剡川也其極目浩渺光景澄澈實東州佳觀云山陰縣志鏡湖中道士莊亦知章所居上虞賀墅亦嘗家焉其宅乃千秋觀此賜後所居也

裘氏義門 嘉泰會稽志平水雲門之間有裘氏自

齊梁以來七百餘年無異爨大中祥符四年用奏
旌表門閭所謂旌表門閭者唐以來有聽事步闌
前列屏樹烏頭正門閥闕一丈二尺烏頭二柱端
冒以瓦桶築雙闕一丈在烏頭門之南夾植槐柳
左右築臺高一丈二尺圻以白而赤其四角今裘
氏用此制自平水適雲門者皆得望其旌表

書巢 弘治紹興府志宋陸游藏書處游自為記劍

南詩稿有書巢五詠

紹興府志按嘉泰志云越藏書有三家曰左丞陸氏尚書

石氏進士諸葛氏中興秘府始建嘗於陸氏親傳其書而諸葛氏在紹興初頗有獻焉可知所蓄之富矣陸氏書特全於放翁家其編目甚鉅諸葛氏以其書入四明子孫猶能保之石氏當尚書時嘗纂集前代古器為圖記亦無一不具其後頗弗克守而從子大理正邦哲盡求得之於是為博古堂博古之所有衆矣三家圖籍其二氏嘗更廢遷而至今最盛者惟陸氏耳

五雲梅舍於越新編在府城內會稽地

林景熙五雲梅舍記

去越城東南三十里曰五雲村王自晉為江左著氏淳祐景定間仕為顯官令臥龍府治之西是其故第會陵谷變遷始各治別第於東南隅詒院梅山君即其居累土為山種梅百本復為堂而扁之曰五雲

書舍

梅花易洞 徐一夔梅花易洞記山陰胡龍臣居越
王山下植梅數百株因名其處

八仙家 寶慶會稽續志在會稽縣五雲門外地名
白塔嵇叔夜過越宿傳舍遇古伶官之魄而得廣
陵散

鳳凰窠 會稽縣志在義峯山下旁有上鳳下鳳村
松花壇 弘治紹興府志在雲門唐大厯中嚴維呂
渭茶宴於此聯句有歲歲松花下今來草色平之

句

青藤書屋 山陰縣志明徐渭文長之居古藤尚存
范蠡壇 於越新編在諸暨縣南九里

珠林 諸暨縣志在五洩山

讀書墩 名勝志餘姚縣栲栳溪傍有讀書墩宋莫
子純元岑安卿皆隱居於此

粟里 會稽三賦注上虞有粟里舜時供儲於此

石壁精舍 嘉泰會稽志上虞石壁山南對小山方

正如樓世號鼓吹樓

謝靈運石壁精舍還湖中詩
昏旦變氣候山水含清暉清

暉能娛人游子憺忘歸出谷日尚早入舟陽已微
林壑斂暝色雲霞收夕霏芰荷迭映蔚蒲稗相因
依披拂趨南逕愉悅掩東扉慮淡物自輕
意愜理無違寄言攝生客試用此道推

顧墅 嘉泰會稽志上虞縣顧墅杜京產與同郡顧

歡在東山開舍授學世傳顧歡家墅在此一作故

墅

劉氏義門 嘉泰會稽志熙寧十年趙清獻為守得

上虞劉承詔十世聚族聞於朝旌表門閭

獨孤處士山居 釋棲白有寄獨孤處士山居詩見

嵯縣志

支道林放馬所 嘉泰會稽志在新昌縣東有放馬

澗道林隱居於此

水竹所 成化新昌縣志在平壺之桂山宋陳雷所

營有緣就堂貯翠樓

禹石船 太平寰宇記塗山有石船長一丈云禹所

乘者

禹廟梅梁 晏公類要梁時修禹廟欠一梁木忽有

風雨浮一木至乃梅梁也

名勝志梁乃鄞縣大梅山梅木張僧繇畫龍於

上後飛入鏡湖與龍
闕乃以鐵索鎖於柱

秦皇酒甕 會稽三賦注在照湖東巨石狀如酒甕

時人謂之秦皇酒甕石

名勝志在會稽縣射的山之趾有三石品峙形如甕

御史牀 輿地紀勝在州東四里虞翻為長沙桓王

所禮特設此牀以表賢客

于闐鐘 竇庠于闐鐘歌注鐘在越靈嘉寺從天竺

飛來

紹興府志靈嘉寺鐘按越中記此鐘本于閩國寺鐘因風雨失鐘所在有天竺僧過于閩

識此鐘於越靈嘉寺至今鎖在寺樓

龍松

弘治紹興府志府城雲門淳化寺西廡有葛

仙丹井有松如龍偃覆井上

松花石 山陰縣志馬自然古蹟高四五尺大一圍

松木所化今在會元董玘宅中

畫水壁 輿地紀勝蕭山覺苑寺後壁有胡舜臣畫

水


畫髓元詮舜臣與張著俱學郭熙山水宋宣和畫院待詔

翠峰寺墨竹 諸暨縣志翠峰寺殿後墨竹宋劉叔

懷所畫

九枝樟 萬厯上虞縣志在崔公祠一本九枝五代

時物



浙江通志卷四十五

欽定四庫全書

史部

浙江通志卷四十六

詳校官給事中臣戴璐

檢討_臣德生覆勘

總校官編修_臣倉聖脉

校對官典簿_臣劉景岳

謄錄監生_臣龔輝遠

欽定四庫全書

浙江通志卷四十六

古蹟

台州府

古州城 赤城志按舊經云周回十八里始築時不
可攷其舊基東自小鑑湖循清心嶺而南縈抱舊
放生池直接城山嶺古通越門土地廟處蓋今湖
昔地皆闔閭中物也後乃徙而縮之

州舊子城 臨海縣志在大固山始建時不可攷相

傳隋開皇時州治在山上城有三門南曰譙門東

曰順政門西曰延慶門故址尚存

王象祖修子城記子城東自鼓

樓踰州學過東山圍包職官廳歷玉霄亭入於州之後山西自鼓樓介於內外班之間而長於內外班曲而為洞門又曲而依於大城內外班者錢氏有國時子弟為守親兵所居也

章安古城 名勝志在臨海縣東一百十五里即章

安鎮也

台州府志相傳即後漢章安縣治前有水即回浦載赤城舊志新志則以為濱海薄

山魚龍所腥豺虎所穴非可奠城市者未知孰是

石鼓山柵城 臨海記臨海縣石鼓山舊有柵城唐

刺史李元奏置

漢城 方輿紀要在黃巖縣北十里建置未詳

台州志

按舊志漢城去黃巖縣北十里有莆林郡城相傳昔置莆林郡於此然未詳何時亦無經可攷

徐偃王古城 輿地紀勝在黃巖縣南三十五里大

唐嶺東外城周十里高僅存二尺厚四尺內城周

五里有洗馬池九曲池故宮基崇十四級城上有

喬木可數十圍城東偏有偃王廟

台州府志偃王古城在今太平

縣西北三十五里又縣南五里有葉鮑二將軍廟或謂卽偃王將也按韓文衢州徐偃王廟碑偃王走死彭城山下又曰偃王之走不之彭城之越城之隅衢故越地也赤城新志謂周穆王時越猶未通中國台去尚猶遠唐嶺又在台極南山谷中於此築城以居何哉又今所謂古城者兩山相距不一二里而謂城周十里其不足信尤昭昭矣但相傳已久姑仍之

樂安縣舊城 萬厯仙居縣志唐上元二年始築樂

安縣城惟東西南三門東則文明樓西則義井頭南則過街樓卽舊址也

寧海縣舊城 赤城志舊城在海游或云唐大厯間

徙

松門城 嘉靖太平縣志宋熙寧間置土兵設巡司
於此明洪武二十年置松門衛其故址尚存

玉環古城 嘉靖太平縣志在玉環海島上與楚門
港隔洪武中徙緣海居民於內遂墟

樂清縣志近
縣有玉環城

玉環鄉南社洪武
中徙其民於內地

古州治 赤城志州治舊在大固山上今永慶院是
其處有子城故址焉後隨州徙

台州府志按舊州
廳置於大固山屈

光公居宅以其地勝立屈氏次子惠坦為太守改家為州按惠坦吳人而臨海郡置於太元二年此建立之始也後以峻不可躋遂徙焉光公即晃

宋諸廳 赤城志通判廳在州西五十步淳熙五年

通判管銳重建添差通判廳在州東四十步舊為判官廳紹興十六年通判洪适改建判官廳在州東七十步淳熙三年以舊比較務改建推官廳在州東五十步嘉定三年推官趙師回重建錄事廳在州南六十步州院在焉宣和三年工曹陳橐建

司理廳在州南九十步嘉定七年司理吳焯重建

司戶廳在州南五十步宣和元年戶曹滕膺建司

法廳在州南十步淳熙九年司法朱孝倫重建支

鹽廳在州東南報恩寺後開禧元年監官王栻以

都監倉改建巡轄遞鋪廳在崇和門外淳熙十年

巡轄趙舜舉建

謝雲台州司戶廳壁記台州司戶參軍唐至德間著作郎鄭虔嘗以

謫官居之今州城東偏猶以戶曹名巷國朝宣和初滕君膺來創解舍為屋三十楹榜曰戶曹廳

宋推勘院 赤城志在州東南嘉定六年守俞建建

宋軍營

赤城志雄節第六指揮營在州東北天慶

觀前威果第六十指揮營在州東米倉前崇節第

三十一指揮營在州東南靖越門內牢城第十三

指揮營在州東都米倉前壯城指揮營在州東崇

和門內

宋水軍營

台州府志在崇和門外東湖宋端拱二

年郡守張蔚建嘉祐中守徐億徙營入城

宋貢院

赤城志舊貢院在州東先以韓運判宅址

為之後徙兜率院殿柱間刻云終場三千人院據
山腹陟降不勝遂徙今地今院內有寧秀亭

漢南部都尉治 元和郡縣志南部都尉本漢之回

浦鄉分立為縣後漢改回浦為章安

輿地紀勝回浦縣即南部

都尉治所

吳臨海郡治 嘉靖臨海縣志吳太平二年析章安

置臨海縣復分會稽東部六縣置臨海郡徙治章

安即今章安鎮

漢回浦縣治 方輿紀要臨海縣東一百十五里本

漢之回浦縣治後漢建武中改為章安縣

赤城志
即章安

城

唐大郭營 明一統志臨海縣東有寨溪舊傳唐末

寇作遣方將軍駐兵於此側有大郭營

宋新亭監 赤城志新亭鹽監在臨海縣東南六十

里按武烈帝廟記乾符二年新亭監給官莫從易

重建堂宇又九國志載元德昭知台州新亭監

漢東甌國 晏公類要東甌居海中今臨海永寧縣

也

黃巖縣志黃巖本東甌地萬厯寧海縣志漢立閩君搖為王置東甌國後國徙乃以其地為回

浦是為東

部都尉

漢東部都尉治 方輿勝覽台州郡漢屬東甌國後
立為治縣東漢末分治縣為東南二部都尉東部
臨海即郡國志東部侯國

唐永寧縣治 後漢書郡國志永寧永和三年以章

安縣東甌鄉為縣

名勝志唐上元二年復置永寧縣則今之黃巖而改名則天授

之元
年也

宋兵屯

台州府志黃巖縣西將旗嶺宋牟大昌屯

兵處又有軍營溪宣和中官軍禦寇結營於此

唐洗馬潭寨

赤城志在天台縣西北下馬橋唐裴

甫之亂以天台國清寺建寨與馬敝潭三墩堂皆

諸將議事之所又有王軍塘為犒軍之所

台州府志舊志

未有寨之名而今稱洗
馬潭寨未知何時也

唐石壘寨 赤城志在天台縣北五十里關嶺上壘

石為之唐廣德元年王師討袁晁處今遺跡尚存

宋始豐寨 天台縣志在赤城山西宋咸平元年建

天台縣志有人於鎮國將軍廟基掘得古鏡文曰始豐寨主鎮國大將雷晔造疑此廟即始豐寨基

晉樂安縣治 元和郡縣志晉分始平南鄉置樂安

縣唐上元元年復置於孟溪側萬厯仙居縣志晉

永和三年析始豐置樂安舊治在西郭演武場北

仙居縣志縣址凡三遷今址起於宋建炎二年令張亨所定舊志稱晉永和四年羊欣所遷誤也相傳羊公時治在金家店宋令陳公襄時治在西郭垵其巖老堂釣魚臺遺跡俱在舊治尚有存者方

行可仙居縣廳壁記仙居晉名始豐後析其南鄉
別為縣曰樂安仙居即樂安舊壤至上元間再廢
再置易曰永安而遷治孟溪即今縣舍也逮景德
中改曰仙居以其洞天名山屏蔽周衛而多神仙
之宅因以名焉

宋白塔寨 方輿紀要在仙居縣西三十五里宋宣

和中因寇亂置寨今為聚落

晉寧海縣舊治 台州府志縣東五里白嶠山晉武

帝初置縣治於此萬厯寧海縣志晉初設於白嶠

唐徙海游永昌元年徙今里

錢惟演寧海縣新建
衙樓記卷惟靈壤實

日奧區地接天台路連石姥時生英秀代出神仙
一派桃源阮肇曾游之地千尋瀑布與公作賦之
邦軒檐半空烟霄咫尺欒拱交結丹漆和鮮晴曦
下照於觚稜翠嶽四圍於與塏雙扉洞啟宜駟馬
之並驅層構鼎新
若蜚雲之擎出

宋松門寨 台州府志太平縣松門山上宋時有松

門寨

潘伯修松門寨詩沙巷蛟涎白沙門
蜚氣平強弩支江斷長槍落日明

梅園 赤城志在臨海縣仙宮後

茶園 雲笈七籤臨海蓋竹山舊傳葛元植茗於此

結廬而居焉

小鑑湖園 台州府志在臨海縣東湖北宋參政賀允中先居天台萬年寺後寓此以唐賀知章自請鑑湖一曲故名有占春堂枕流漱石二亭

琪山園 臨海縣志舊名小寒山即南岡書院

松隱園 萬厯天台縣志宋開府曹勛宅在北城外嘉靖臨海縣志在縣之清潭山有明秀堂莊畔有陂廣十餘里

陳氏園 曾丰東巖堂記天台為二浙第一勝處今

臨川陳公劃所辟城東數十畝而東西之東所揭
曰小瑤曰生秋曰瓜風曰蜜露曰薺芳凡五西所
揭曰開春曰見笑曰問開曰花嶼曰飲巢曰數紅
曰記好曰涉趣曰四友凡九其外則二堂突兀東
曰東巖五之會也西曰勝賞九之會也東巖則又
西勝之會歟自慶元丁巳經始自為韻語樂章發
揮之園無遺景景無遺勝公名廣壽字成卿

南園 萬厯天台縣志縣東門外有宋待制黃宜南

園今廢為農田俗稱黃府園其宅在縣東一里

小西湖園 赤城志仙居縣西有小西湖給事吳芾

所創延袤數里有亭館几十數

仙居縣志即今石井之畫眉潭

吳芾蓄水為湖岸植桃柳朱闌環繞誠勝地也

淡園 萬厯仙居縣志在縣北光明山之陽內有倚

嘯閣連漪亭通幽處拜石軒諸勝宋張文肅公次

賢投閒處也

東澗園 萬厯仙居縣志在城南東河宋提舉陳章

引河水貫其中跨以虹橋叢以竹林有浮香羽波
諸亭及五松臺為邑名園之冠

閬風園 崇禎寧海縣志在主簿署內劉次臯建

雲海觀園 崇禎寧海縣志丹丘見於孫綽賦其地

有丁氏園名雲海觀

王綽雲海觀記丹丘列仙之所萃松山丁君少雲即其所

居依山闢園回環曲折曰堂曰亭曰臺曰榭曰林曰坡曰窩曰谷無慮二十餘具載於雪巢林景思之賦咏至於奇詭特異之觀則自小垂虹而入跨蓮蕩不知幾何畝有堂歸乎其上曰芙蓉此尤雪巢之所長吟而永歌者龍川陳同甫一見輒心可之距今五十有二年予植追想舊事因芙蓉故址

欽定四庫全書

卷四十六

敬為傑閣以雲海觀目之蓋取坡公玉霄雲海之詞以補先世之未為者子植名木

藥園 謝伋藥園小畫記余家舍之旁葺茅竹為園總名之曰藥園下瞰黃甘塢後浸白蓮池有水芝軒靈泉館挽衣寮潤畦亭劖青堂薜荔堦明珠菴僧宗了畫為圖筆跡甚可喜

丁園 嘉靖太平縣志在溫嶺宋嘉祐間丁仲鑑創熙春館 赤城志在府治淳熙十六年守史彌正建天台館 赤城新志在府治南一百三十步宋紹定

中倉使葉棠建

赤城志俗名行街

嘉祥館 赤城志在州東五十步舊號小行街

泰安館 石公孺臨海泰安館記紹興六年徽猷孫

逸建

望海館 臨海記臨海宴室山上有越王望海館

亭山館 赤城志在黃巖縣南瀕河慶元五年令常

濬孫建

澄江館 黃巖縣志在黃山樓側宋紹定二年令趙

汝駟建并記

靈溪館

正德天台縣志唐靈溪館在縣東

許渾發靈溪館

詩山多水石窮一葉似漁翁鳥浴寒潭雨猿吟暮
嶺風雜英垂錦繡衆籟合絲桐應有曹溪路千巖
萬壑中鄭巢靈溪館詩孤吟疎雨絕荒館亂峯前
曉露樓危石秋萍滿敗船溜從華頂落樹與赤城
連已有求閒意
來期在暮年

金庭館

名勝志在桐栢山北許邁與王逸少書云

自山陰至臨海多金庭玉堂仙人芝草是也

白鷗莊 王士性白鷗莊自記余郭東溪頭小隱處

也得二洲三島有白石山房空濤閣綠雲亭蓮社
竹籬茆舍夕陽塢先月墩嘉樹臺白龍溪芙蓉城
三星石曲水瀨竹林精舍小祇林雲碓卧雲坪忘
歸石是地為宋秘閣陳良翰之故居

靜鎮堂 方輿勝覽在州治唐李嘉祐為守竇常贊
之有雅登郎位靜鎮方州之句故名

君子堂 赤城志在靜鎮堂之前太平興國三年畢
文簡士安來守真宗有君子之稱故名

尤袤題府
署君子堂

詩堂堂文簡公一世夔與臯君子哉若人此言聖所褒遺愛在斯民誰能薦牲牢獨有坐嘯地清風

仰彌

高

節愛堂 輿地紀勝在州治君子堂右赤城志舊名

燕豫淳熙四年守尤袤重建改今名

尤袤節愛堂記過靜鎮堂

之左少南為方池並池而南牆壁障礙敗屋傾欹問諸故老曰此昔之燕豫堂也池舊有橋橫縱齊度其東為草堂今皆毀撤後人因基築臺以望月其下枕池為小閣名曰清平臺亦漸頽圯余既徙臺於參雲亭之後榜曰匡峰以望北山更作堂曰樂山以望西山之秀而池光山色且蔽於閣而不得見也乃徙閣於池之南因燕豫堂之基別為堂曰節愛取節用愛人之義旁為扶廊而上與樂山

堂通池之北石崖盤踞土壤所壅疏剔理脉發露呈顯如枕股膊如覆困廩如龜鼈之背負土而出西望連岡疊嶂如擁鬢髻如展旌旆如風檣陣馬排闥而入其南則怡憤二峯角立明秀若偉丈夫冠劍而坐雙塔亭亭影插半天於是仰山俯池遠樹近石環列先後若相拱揖烟消日出層樓飛閣浮虛跨空如展圖畫如望蓬萊之雲氣也夫昔人經始莫不相山川之宜一定而不可易後人見其蔽而不能復也始出已意變易之遂使昔之勝槩日就湮沒今余非獨能有所增創也大抵無改前規無廢後觀覺天宇開明巖壑爭秀林木水鳥皆有喜色而後知昔人之規模可因而不可變也尚告來者嗣有葺焉始欲跨池為橋池上有老梅惜不忍伐遂不復作

霞起堂 赤城志在靜鎮堂後淳熙三年守尤袤建

取孫綽賦赤城霞起之句

台州府志明天啟中改為霞起樓

凝思堂

輿地紀勝在霞起堂後淳熙中守尤袤建

雙巖堂

赤城志在凝思堂後慶曆八年守元絳建

謝俊雙巖堂詩靈沒雙巖已百年班班勝事漫流傳幸陪佳客揮華塵還欠傾城舞繡筵故老風流寒似鐵月卿英妙筆如椽拂衣便欲故山去復恐眼中無此賢

樂山堂

輿地紀勝在清平閣下淳熙中守尤袤建

和青堂

輿地紀勝在州治

與清堂

陳埧與清堂記台州錄事廳舊有挹翠堂

趙君汝回作郡葺而新之更曰與清

青青堂 石公孺青青堂記會稽陳索德應司台之
工曹事廳之西為小堂植竹數百竿命之曰青青
即錄事廳是也

登瀛堂 輿地紀勝在倅廳慶元三年通判趙彥衡
以欽廟所賜唐十八學士像刊於壁故名

景沂堂 歲寒堂 赤城志並在通判廳

李宗勉重修台州通

判廳記廳事穹隆堂字顯敞廊廡纚麗戶牖燦閭
總為楹三十有四舊有芝秀承其左登瀛景沂歲

寒處其右堂後山巒鬱律林木青葱自蓮風閣登
萬壑風烟最為奇勝旁列雲水梅榭雲海嵐闌無
非肅咏游息之所迎風納月恍若
蓬壺觀者愕眙為千里壯觀

清閼堂 赤城志在添差通判廳通判洪适建於分

繡閣之下

洪邁寄題清閼堂詩昔聞王子猷借宅亦種竹此君固可喜人亦清不俗伯氏

貧而癯一飯不飽肉堂前自經始護此無盡綠一官歲強半餘日如轉燭待其長稚子而已牽歸轡何由享嘉蔭償我志願足應煩彼邦人日報平安福

遺直堂 赤城志在推官廳後熙寧中孔文仲為從

事手植檜於堂後越八十年其甥曾幾來為守因

揭今名

曾幾題遺直堂詩三孔吾渭陽猶及見仲叔堂堂舍人公再拜但喬木長身一庭中

勁氣九霄上思公立朝時凜凜不可尚

虛照堂

平心堂

琴堂

嘉靖臨海縣志並在縣

治內宋淳熙中令彭仲剛新之並有詩

孔先堂

赤城志在臨海縣簿廳嘉定七年主簿趙

汝駒建

葉適孔先堂銘非籍不有惟籍乃守先聖所止後學敢繆臨海之邑俞米寸帛必信

必實以作民極

景樞堂

赤城志在臨海尉廳內淳熙六年尉葉高

建以王淮先為尉後位丞相故名

赤城志論尉廳在州東四里地

據形勝其前秀巒環峙曠野平鋪後有峯屹然龍困水瀉出其右是以為吏者多通顯云

瞻節堂 赤城新志在郡城朝天門外元泰定間郡

守趙鳳儀建

共樂堂 輿地紀勝在郡城外東湖台州府志宋慶

元三年郡守劉坦之改名知樂

綠猗堂 赤城新志在臨海城門張哲齋建

文天祥綠猗堂

詩并引予自海舟登台岸至城門張氏蓋國初時名將永德之後主人號哲齋闢堂教子扁曰綠猗

為賦八句義方堂上看窓戶翠玲瓏研裏雲壇月
席間淇水風清聲隨地到直節與天通庭玉森如
筍干霄
雨露功

清心堂 民和堂 赤城志在黃巖縣治紹興中令

楊煒建堂名曰清畏後令胡璉去畏字改名清軒

後令劉鼎孫又改曰清心并建民和堂於縣圃

鄭伯

熊清軒詩樹蕙餘百畝執蘭當路岐清風一披拂
香氣無不知紉為楚纍佩辱我幽靚姿小草生澗
底雨露無思私不入兒女玩歲晚
得自持所以古君子清德畏人知

歡顏堂 黃巖縣志在縣廳後宋嘉定元年建

香遠堂 赤城志在黃巖縣丞廳舊名紫翠軒嘉定

十五年丞趙彥珽更今名

左緯香遠堂詩試捲朱簾看青山有幾重崢嶸

秋色老蒼莽暮烟濃未辨清猿處遙知白鳥蹤藍田無此景留盼只雙松

王公客堂 太平寰宇記臨海仙石山有館土人謂之王公客堂兩邊有石步廊王方平所游之地

李商隱著書堂 輿地紀勝黃巖縣西崇報寺靈石傍有唐李義山著書堂

金山堂 輿地紀勝黃巖縣金山上銳下闊宛若金

字王侍郎居安築堂面之號金山堂

秀野堂 王瞻叔有題台人秀野堂詩見王梅溪集
靜治堂 樓鑰靜治堂記丁君大榮宰天台闢縣治
之左為堂請書扁且求記焉

平心堂 赤城志在天台縣治淳熙三年令薛洪建
瑞萱堂 赤城志在天台縣治乾道二年令李異建
嘉泰二年令丁大榮得粟一莖六穗更名瑞粟堂

高察書堂 萬厯天台縣志縣北察嶺與金地嶺接

漢高察所隱之處舊有讀書堂故址

顧歡書堂 天台勝蹟錄天台顧儒嶺舊名東邱有

齊顧歡讀書堂

天台縣志今晉慶寺即其故址

太白堂 王士性遊天台山記度華頂有王右軍墨

池上為太白堂其堂前有三娑羅樹四月花開如

芍藥

賈詩太白書堂詩太白千載豪神遊渺湖海漠漠此山中而有書堂在崖斷綠蘿深澗寂

寒泉灑撫景一懷

思彷彿瞻雲采

雙清堂 天台縣志在大隱峰宋錢厚之建王銍記

玉輝堂 王士性遊天台山記巾子山半為玉輝堂

登堂見靈江來自西北環抱於前

雷峯堂 天台勝紀在興國寺上傍有智顗繡經臺

巖老堂 名勝志在仙居縣治宋皇祐元年令陳襄

建

輿地紀勝按陳襄仙居詩自注云嘗鑿池引水經竹林間以環流釣翁名臺習坎嘉魚名亭未

知在縣治何處今不可攷矣陳襄巖老堂詩手持養性書此地學樵漁身類龍蛇蟄情深木石居先迷成遠復正靜得中虛何必求深隱幽蒙是所廬

安樂堂 赤城志在仙居縣治紹興中令杜師旦建

秀岐堂

仙居縣志在縣治宋慶元中令尤棐建

愛山堂

仙居縣志在縣治宋嘉定中令董履道建

衆樂堂

仙居縣志在縣圃宋淳熙中令唐仲溫建

鼎山堂

赤城新志仙居縣西有桐江書院宋方斲

本唐方干之裔因朱熹因行部過此為書鼎山堂

扁王十朋為書東南道學世家

鑑玉堂

台州府志在仙居南峯宋蔣應雷構理宗

賜榜

仙居縣志應雷祖覺軒與朱晦菴游鑿山南
桃花洞築書院於上王魯齋詩云藥鼎香浮

栖鶴寺書堂影壓釣魚船郭磊卿詩云鳥飛
塔畔雲低樹忽聽清流棹客船皆紀實也

三瑞堂 方輿勝覽政和四年洪皓為寧海主簿建

時以荷花桃實竹幹並有連理之瑞已而生子适

故名

洪适以貳車行縣過三瑞堂詩久已馳魂夢
今登三瑞堂故山有喬木近事話甘棠展驥

慚充位占熊憶問祥白
雲留不住極目是吾鄉

寶勅堂 崇禎寧海縣志宋提刑羅適建

赤城書堂 王應麟赤城書堂記寧海之先賢曰赤

城先生羅公德業為元祐名臣踰二百年前進士

胡君元叔倡率鄉人倣古閭塾之制即公游息之地創為書堂令鄉之俊秀子弟淑艾之

新田書堂 赤城新志在寧海宋石斗文建

月桂齋 名勝志在台州郡署唐垂拱四年月中桂

子降台州司馬孟說冬官侍郎狄仁傑以聞

互見公署

集寶齋 赤城志在州治清平閣右舊在雙巖堂左

治平四年守葛閣建集葛元司馬承禎柳公權及近世名人翰墨刻其間嘉定元年守李兼徙今處

依正齋 趙師回台州推官重建廳事記舍人孔公

在官日庭植雙檜後曾文清命其堂曰遺直賦詩

十二章有百年依正直之句榜其齋曰依正

孔公見前

遺直
堂

舫齋 黃巖縣志在縣治宋開禧中令趙汝伯建

雪齋 寧海縣志在閭風里宋逸民劉次臯吟室

雙瑞軒 赤城志在郡圃內赤城奇觀後嘉定四年

守黃菴以粟九穗麥兩岐故名

持節軒

趙師回台州推官重建廳事記依正齋之

西闢小軒手種梧竹名以持節

與清軒

趙汝回重建錄事廳記寶慶二年余來為

錄事植竹數十更挹翠軒曰與清

謹按台州府志慶元四年趙師回為添差通判嘉定初有趙思回為推官而無趙汝回疑舊志錄此誤也

擁青軒

瘦軒

赤城志並在臨海縣治瘦軒嘉定

十六年令朱中直建

思隱軒 林仰臨海縣尉廳思隱軒記金華王季海
作臨海尉葺舊屋用梅子真故事名曰思隱軒

廣軒 方輿勝覽州東南巾子山北有廣軒下瞰闔

閭南眺郊藪市廛山川之盛一目俱盡

蹙雲軒 方輿勝覽在巾子山

台州府志
作礙雲軒

無倦軒 黃巖縣志在縣廳東宋蔡範題

雙檜軒 台州府志黃巖趙占龜家有軒面雙檜人

呼為雙檜隱士宣和中寇亂相戒無犯是軒

藍光軒 趨稼軒 輿地紀勝在仙居縣南峰有南

塔二軒下瞰大溪

葉翥藍光軒詩出郭纔咫尺便覺山意幽招提立絕頂寶塔凌

空浮小軒足娛客下有清溪流翠岫供遠眺直欲明雙眸平蕪草肥軟飽飼眠吳牛沙頭水色靜飛上
馴白鷗人稀日亭午野渡橫孤舟坐久意逾爽吹袂風颼颼想當三伏天凜然如素秋乘興偶登覽
不謂成勝游平生志所願一壑與一丘脚力到佳處須作信宿留南峯只在眼不必勞冥搜當時輞川圖景物有此不學責守所見出處各異謀淵明亦高哉未肯屈督郵

至元軒 葉翥有至元軒詩見仙居縣志

翥宋紹興中為縣尉

梅軒 萬厯寧海縣志在尉廳嘉定十六年尉葉象

翁建

徐允州梅軒詩香老虬枝古花開
傍短扉昨宵微雪灑四檻玉鱗飛

不負軒

萬厯寧海縣志在治南塘頭宋趙孟禮建

存高宗勅贊

東嶼軒

嘉靖太平縣志在金山下宋王居安作

松桂軒

嘉靖太平縣志在洞黃元黃谷春所居又

有集怡樓陳鏗有記

參雲亭

赤城志在州治山上慶厯七年守元絳建

前有羅漢樹頗奇怪

元絳參雲亭記州治據大固
山介天台栢蒼之間北直大

海潮汐遡江薄城而羣山阮東水不得肆慶歷五年夏海溢漂室廬明年余來守茲土拊視凋瘵乃循周官聚養萬民之法招徠安輯之因新城出帑金以購材募工旬歲而功既乃取賸材於二山之交作雙巖堂緣山椒作參雲亭天空地迥萬象在下射有長圃飲有曲水日為文酒之樂州人縱游鼓舞於庭除之下春秋之法興作始事必書予是以為之記

駐目亭 天台要覽慶歷七年元絳守台作駐目亭於山上憑高眺遠極為曠朗

玉霄亭 赤城志在參雲亭左紹興十七年守曾惇建取玉霄峰而名尤袤有記嘉定十六年守齊碩

修後軒

舒嘯亭 輿地紀勝在參雲亭後赤城志舊名匿峰
淳熙四年守尤袤建紹熙元年守江乙祖更今名
澄碧亭 名勝志在靜鎮堂左舊名興移

解纓亭 赤城志在參雲亭東嘉定四年守黃黻建
瑞蓮亭 赤城志在節愛堂前池心舊名玉虹嘉定
四年守黃黻以平橋獲瑞蓮更今名

雲海亭 台州府志宋時通判廳上有雲海亭

萬壑風烟亭 方輿勝覽在倅廳後赤城志在山上

萬山拱揖一江演迤井邑粲然在目最為奇勝慶

元三年通判趙彥衛建

陳觀重建萬壑風烟亭記官舍負大固山余舊聞有

亭得登臨之勝暨來丞郡公退尋訪即斯亭故基敞為一堂基闢於新名承其舊

舞猗亭 赤城志在添差通判廳清閼堂後

飛躍亭 吳子良飛躍亭記臨海縣治北里許小坡

蜿蜒號環翠山旁瀕驛河紹興二年令黃君準始

面山鑿池又築亭負山而臨池名之曰飛躍

石橋亭 元豐九域志蓋竹山有石橋天台記云橋

上有小亭橋龍形龜背駕在壑上有兩澗合流於

橋下洩為瀑布

輿地紀勝
在臨海縣

秀野亭 臨海記在縣東普濟院後其地多梅花

元絳

秀野亭詩亭占青山口郊原四望平遙林連崦黑
白水隔田明翠麥波濤動飛泉劍佩輕長年便野

趣擬欲
解塵纓

樵夫亭 王士林樵夫亭詩注在東湖中

東湖亭 赤城志在臨海縣東湖上乾道五年建

浣月亭 馮甦東湖書院記臨海東湖正中為湖山

寺寺南為浣月亭其北為樵雲閣

流杯亭

輿地紀勝在東湖共樂堂之前

赤城志錢守膾立址

於湖心水光山色為春夏行樂勝境台州府志弘治中改名薰風

皇華亭

飛仙亭

赤城志郡城中津橋北即皇華

真人上昇處又有飛仙亭在其傍

隔塵亭

輿地紀勝臨海縣東掖山上有隔塵亭

石象

之隔塵亭詩山椒亭榭適徘徊一片煩襟覺頓開若有塵埃何處隔此中自是少塵埃

飛蓋亭 黃巖縣志在縣治宋嘉定中令陳夢建建
淨涼亭 黃巖縣志飛蓋亭北宋嘉定中令趙湜建
傳香亭 謝直黃巖縣尉廳記宅之西翼以憇者曰
傳香之亭

雲波亭 赤城新志在黃巖縣酒稅務側宋紹興中
令楊煒建

方山亭 台州府志黃巖縣永寧山俗號方山山下
有亭夾岸梅花綿亘十餘里不絕

擘翠亭 黃巖縣志黃巖縣靈巖有飛瀑垂崖而下

宋慶元四年令常濬孫亭其上曰擘翠

赤城新志
樊川書院

為晦菴先生與南湖方山二杜公講
學之地旁有擘翠亭亦先生所建

來鶴亭 赤城新志在黃巖縣委羽山元劉德元建

二公亭 黃巖縣志在靈巖黃綰建以待王陽明湛

甘泉者

少谷亭 黃巖縣志在翠屏黃綰為鄭善夫來訪因

建此亭以待之

多錦亭 赤城志在天台縣圃嘉定中令邵繼元建

墨池亭 列秀亭 天台縣志在華頂峰王羲之墨

池上

浮盃亭 鄭至道天台劉阮洞記迎陽峰之下有石
偃於山腹寺僧因石址結亭於上

阮郎亭 天台勝紀在天台羊曄嘗遊崖上舊有字
世傳劉阮所題曄醉亭畔七日方醒夢食青靈芝
嗣後日可行數百里

濺珠亭 赤城志天台桐柏山瀑布巖下有瀑布蔽

巖狀若垂蛭數百丈宋時有濺珠亭

天台縣志又名噴雪亭

曇華亭 王士性遊天台山記石梁山壁對峙一巨

石如長虹橫架廣不盈咫前臨萬仞壑上游澗水

二並流墮石梁下上有曇華亭楹半外垂王龜齡

碑刻存焉

先照亭 赤城志在天台縣石橋菴應真閣傍

佇真亭 天台山方外志在石梁下惠濟潭側

天台縣志

禱雨祈龍舊於臺華亭後以其憑高視下乃建亭於潭側而禱焉

許來亭 響空亭 瞻風亭 方廣亭 盧濬遊石

橋諸山記石橋下有諸亭悉歸草萊矣

雨華亭 天台方外志在國清寺後巖

棲鳳亭 輿地紀勝天台縣北紫籜山與天台接舊

名竹山唐天寶中明皇夢竹山神來翼日有鳳翔

之異因名瑞峰上有棲鳳亭

流花亭 天台方外志在桃源

金波亭

天台勝紀在墨湖上

善利亭

天台縣志在桐柏嶺上有石白泉注其中

清甘可愛舊柱上有題云建炎四年拱衛大夫博

州防禦使前充高麗國信使韓行記

凝香亭

送紫亭

列遠亭

萬厯仙居縣志並在

縣後圃俱宋淳熙中令唐仲溫建

真趣亭

仙居縣志在縣治宋嘉定中令董履道建

第一香亭

萬厯仙居縣志在丞廳後

盡美亭 名勝志仙居縣福應山得邑地之勝陳述

古名曰福應朱晦菴更名盡美宋紹熙中建亭於

上

張景修
為記

斗起亭 赤城志仙居縣萬安院後有萬竹源左昇

崇岡重巒複嶺如屏列可眺可詠舊有斗起亭宋

建炎中左丞薛昂居之

綠筠亭 台州府志在仙居縣韋羌山上

涵青亭 萬厯仙居縣志南峯山桃花洞最擅山水

之勝古有涵青亭

翫景亭 明一統志仙居縣景星山萬仞壁立宋令

陳襄建亭

東山亭

楊宓有題東山亭詩見仙居縣志

宓宋大觀中令

仙居

前山亭

楊筠有題前山亭詩見仙居縣志

筠宋紹興中令

仙居

鎮亭 赤城志在寧海縣西北八十里台明越三界

間

岸幘亭 赤城志在寧海縣圃宋建炎元年令魏賁

建

雲錦亭 萬厯寧海縣志在治西圃蓮池中

徐允珪雲錦亭

詩亭立波心小芙蓉繡綺紋似裁千片錦散作一池雲

交翠亭 輿地紀勝在寧海簿廳宋政和五年主簿

洪皓建

洪适題交翠亭詩三十年中事鸞棲築小亭寒聲長新篴清闕拂疎櫺水轉前時綠

山濃遠處青重來勤問訊此別記秋螢

瀛巖亭 輿地紀勝在寧海縣東崖崆險絕下蘸海

中上有小亭石壁刻瀛巖二字

崇禎寧海縣志二字為宋令高述襲

明書高述登瀛巖詩懸崖塔影蘸寒川落木鐘聲渡野船潮去潮來幾朝暮不移一片白鷗天

柘浦亭 赤城志在寧海縣傍紫溪鐵場

適志亭 崇禎寧海縣志在治西宋慶元四年主簿

胡宗建

蟠松亭 寧海縣志在梁王寺前宋令方懋烈建

會總亭 嘉靖太平縣志縣西北王城山北有總山

舊名杜山有會總亭

壽台樓 王象祖壽台樓賦序倉使寶謨葉公再造
台之明年作樓於舊栢蒼之上扁以壽台欲此城
與台星長久為民之意無窮也宋紹定己卯落成
和豐樓 赤城志在天台館南宋慶元四年守葉甄
建

多音樓 赤城志在三酒務北宋慶元四年守葉甄
建

神秀樓 陳耆卿神秀樓記台州九門各有樓神秀
獨南峙更雄麗焉丞相趙忠定自太史守台時建
半江樓 台州府志在臨海縣城外舊名映江樓
宴海樓 陳函輝跋傳郡公宴海樓記樓在郡南城
敵樓之上

丹鳳樓 台州府志臨海縣蓋竹山上有丹鳳樓為
游覽之勝

八景樓 舊址無攷

高似孫八景樓記山水之壯莫如海風物之神亦莫如海六鼇

出沒三山沐浴乾坤一碧萬頃天琛水怪鮫室珠
宮何有何無秘怪恍惚不可一景名也陳君堯章
甘棲其濱凡海情狀以智受之為其游息之物高
明之具雖未得拍斯閭固已翛然望蓬萊之雲氣
懷乘桴之壯游

摘星樓 赤城志在黃巖縣治燕堂後宋嘉定四年

令楊圭重建

黃山樓 黃巖縣志在縣治北利涉橋南宋宣和間

令王然建

名勝志宋參政樓鑰書

謹按明一統志作令楊圭建考台州職官志王然以宣和四年令黃巖而楊圭以開禧中為令則此

樓或是圭重修圭與樓鑰同時故為書
榜而建樓之始當是王然一統志誤也

明德樓

赤城新志在天台張可敬建

徐一夔明德樓記吾邑張

可敬氏一日手一卷見余於授經之堂發而視之
則前內翰鄱陽周伯溫甫所篆明德樓三字周公
以篆書名世而此三字端勁圓潤得斯水之妙已
而問樓之面勢與名樓之義可敬進曰吾居在邑
中先大父為處州學官而歸爰作茲樓以務窮理
盡性之學適周內翰過天台嘗登吾樓為書此三
字揭之楣間以示正學之有在

棲雲樓

張存遊國清寺記樓最為幽勝

脊青樓

萬厯仙居縣志在縣署元至元中建

友菊樓 萬厯仙居縣志在縣南硃溪宋呂六松構

齊清樓 曹質有齊清樓詩見仙居縣志

質宋皇慶中令仙居

清風樓 萬厯寧海縣志在縣尉署舊名一覽宋紹

熙中尉馬迥建

翠微閣 赤城新志在郡城巾山上宋寶祐中守趙

與諲建

戴復古巾子山翠微閣詩雙峯直上與天參僧共白雲樓一菴今古詩人吟不盡好

山無數在江南

清平閣 輿地紀勝在州治節愛堂右山下賀允中

以守蕭洽清平而名

黃閣清平閣記客遊乎郡治
徜徉四顧有閣翬飛上冠新

亭下臨清池可以觀政可以燕賓可以賞心而娛
情郡侯黃公所築也既成而揭以清平取梁太守
蕭洽為政之旨問其名則參政賀公之所命也其
書則戶侍錢公之筆挹清風之徐來瞰平波之不
興左顧右盼朋儷美豈直登玉霄上參
雲為極目之榮觀而已哉公名章字仲微

凝香閣

赤城志在靜鎮堂左宋嘉定六年守俞建

建

見山閣

輿地紀勝在州宅後

東山閣

赤城新志在郡治東

蓮風閣 赤城志在通判廳宅堂後側有流花渚漾

花池後有翠麓

分繡閣 方輿勝覽在添倅廳通判洪适建

洪适分繡閣記

天台郡踐山作郭而餘麓及屹立之峯廢不可廬者亦十一二故官寺民區鮮鉅麗之所十數年中監州始有以員外置者僑於城之巽隅距黃堂七百步而羸其職業之商黹僚窠之謁請不足以為便乃徙幕曹之舍為今所居與正員相東西焉然規恢下窄榮與埃墨無復明軒虛牖尚佯敞豁之勝獨東偏有地斗大培基建閣以夏四月課材閱月而斤斧論功其高四尋衡袤二十有七尺南北不及者九之一羣山縈環垂光獻狀可以分繡名風籜雲梢映燭左右目其堂曰清闕閣之後舊有

蔬畦更以嘉葩中穿小池可容蒲荷登臨旦望則
巖姿之四時烟霏雲采之隱見茂木敷陰幽禽啾
聲過耳娛目景與意會閒日觴朋命案奕
棋援琴放歌灑然不自覺其在塵坭中也

高閒閣

舊址無考

趙師回台州推官廳事記宋嘉定二年余為推官重建廳事齋

閣思昔達尊嘗入此幕如正獻何公天性超融
其詩有高共白雲閒志尚可想乃扁閣曰高閒

觀閣

赤城志在州東順感院後

趙企題觀閣詩一上危梯一解顏重

岡複嶺四周環山川盡出登臨外天地都歸俯仰
間飛鳥直隨雙目斷游雲嘗與片心閒文書了却

無餘事日午
須來日落還

標霞閣

赤城志在天台縣治宋嘉泰初令丁大榮

建

玉霄閣 名勝志天台山玉霄峰下有小閣臨官道

傍陸游名之曰玉霄閣

陸游玉霄閣詩竹輿衝雨到天台綠樹陰中小閣開

榜作玉霄君會石要知小吏按行來

翠微閣 萬厯仙居縣志在南峰北麓宋張樸構

梅臺 方輿勝覽在郡圃赤城竒觀前宋開禧元年

守錢文子建下臨巨壑有梅數十本

觀蒼臺 赤城志在通判廳後山上後改為雲水亭

月臺 赤城志在通判廳宅堂右宋嘉定十四年通

判何洙築

閬風臺 輿地紀勝臨海縣北天門山西麓拔起千

仞上有閬風臺

王士弘登閬風臺詩碧落簫音隔彩霞閬風臺見地仙家手攜青杖

萬年竹髻插錦桃千歲花月上高松留白鶴雲封古洞毓丹砂中天絕頂無人到流水華源莫放槎

容光臺 黃巖縣志在縣署宋嘉定中令蔡範建

見山臺 謝直黃巖縣尉廳記四明楊璘尉黃巖宅

西有地平曠累臺以望山

吹簫臺 臨海記黃巖聖巖山有子晉巖相傳王子
晉吹簫其上

問松臺 赤城志在天台縣治宅堂後有大松如偃
蓋舊為松風亭宋嘉泰三年令丁大榮築為臺

瓊臺 王士性遊天台山記自桐柏行五里至瓊臺
臺在大壑之心石山空起狀如削瓜下俯百丈潭
丹丘臺 正德天台縣志東橫山方頂上

竹溪釣臺 天台志要在縣東南六里溪南下黃有

徐竹溪書院竹溪釣臺在其傍

望月臺 摘星臺 慶雲臺 萬厯仙居縣志並在

景星巖蓋邑之最勝處宋吳康肅嘗讀書其地

偃松臺 台州府志在仙居縣東嶺臺下舊有大松
蔭數畝為人所伐旁發一枝不數年而成圍

望海臺 嘉靖太平縣志在總山會總亭側

鄭公臺 台州府志太平縣靈湫山傍

許邁宅 台州府志臨海縣蓋竹山有石室晉許邁

嘗宅於此舊傳漢末有陳仲林等四人入此山得

道

余與玉京洞許邁宅詩東臨滄海宴羣仙誤入桃源小洞天一局殘碁消幾刻老龍鬚甲已蒼

然

陶弘景宅 赤城志在臨海縣燈壇觀舊經云陶弘

景結廬於此

顧況宅 輿地紀勝在臨海況有臨海所居詩

鄭虔宅 輿地紀勝在州東戶曹巷以唐鄭虔為戶

曹日居此

葉裕宅 台州府志唐殿中侍御史葉裕舊居台城
後棄官隱寧海縣之東倉

閻邱氏宅 臨海記臨海閻邱山昔有逸民閻邱氏
居此故以名山

綦宗禮宅 台州府志在臨海治東宋紹興中綦內
翰宗禮以忤秦檜謫台居此

秦國長公主宅 台州府志在郡城東北隅宋仁宗
第十女南渡時尚存高宗極尊禮之奉居台州子

錢忱孫端禮曾孫象祖開禧三年守李兼為建美
德坊今石柱尚存

于履宅 台州府志後唐于履隱居不仕居黃巖葉
茶寮山自號藥林

謝伋宅 台州府志伋上蔡人參政克家之子宋紹
興初侍父寓居黃巖靈石後居三童號藥寮居士
徐中行宅 黃巖縣志在委羽山與其子庭筠皆宋
高士今稱二徐宅

左琿宅 黃巖縣志在邑東桂林橋琿兄弟皆中第

故名叢桂坊

林鼎宅 葉適二林墓誌二林黃巖之大儒鼎字伯

和鼎字叔和今表其所居曰景賢坊

黃巖縣志在邑東景賢巷

池從周宅 黃巖縣志在縣治西街

彭龜年椿年宅 黃巖縣志在邑東南

王居安宅 黃巖縣志在縣東巖魁坊俗呼郊家巷

嘉靖太平縣志居安字資道宅在方巖鄉大溪金山之南

車若水宅 黃巖縣志在謳韶

趙師雍宅 黃巖縣志在西橋

杜範宅 台州府志在靈巖 黃中德重修杜清獻公祠堂記丞相台之黃巖

人宋淳熙元年生於杜曲里後葬於黃杜嶺即其山為造五鳳樓

褚伯玉宅 徐靈府山居記在天台桐柏觀之小嶺

柳泌宅 晏公類要天台觀東有柳泌宅基 天台山方外志

丹霞小洞在天台縣西北唐柳泌授州刺史不之郡於此修藥今天台觀是其所居也赤城志天台縣福聖觀前對靈溪其東有柳泌使君宅號紫霄山居

司馬承禎宅 晏公類要桐柏觀白雲先生之居唐

景雲中為司馬子微置

徐靈府宅 天台山方外志縣西北方瀛山唐長慶

中徐靈府居此

鄭至道宅 正德天台縣志在關嶺宋令鄭至道去

任邑人攀戀不忍舍遂留家焉今其裔猶有存者

杜京產宅 正德天台縣志在招隱嶺

賀允中宅 天台志要在萬年寺西

潘子善宅 萬厯天台縣志縣西思賢橋因宋儒潘

子善故宅而名

劉佐宅 正德天台縣志晉黎護將軍劉佐宅在縣西永坊後捨為闡法寺及寺徙佐廟食其地

項斯宅 萬厯仙居縣志相傳在介山下三學寺

張阜宅 赤城志仙居縣張阜山逸民張阜居此

林達本宅 台州府志仙居縣東山宋林達本隱此

呂逢時宅 台州府志仙居縣白巖宋呂逢時隱此

蔣晉宅

仙居縣志柘溪有宋蔣晉宅

梅盛宅

台州府志晉梅盛令章安遂徙寧海縣之

寧和居焉有鳳集其庭今其宅為丹丘寺

葛元宅

赤城志寧海桐柏山有桐柏里葛元居此

友鹿翁宅

台州府志不傳姓名宋末隱居寧海縣

者山下方遜志為傳

舒岳祥宅

台州府志寧海雁蒼山宋舒岳祥隱此

葉夢鼎宅

台州府志寧海縣狀元峯宋葉夢鼎讀

書於此

方孝孺宅 台州府志寧海縣躍龍山方正學先生

世居山下後因建祠其家徙城內其故居義井尚

存

名勝志國初刑部尚書魏澤謫臨海典史時捕正學家不許容留一人公為出其孤謝文肅詩

所謂孫枝一葉存澤有過孝孺故居詩筍輿衝雨過侯城撫景令人感慨生之句

王喬宅 台州府志太平縣晉源山相傳晉王喬居

此下有晉湖

嘉靖太平縣志縣東屏山南有晉源明覺寺有小碑其文曰晉王游適處

蔡鎬宅 林昉先賢祠堂記鎬世居太平方巖鄉之

白山因建開功後與朱子並祀

蔡錫山居詩水從白塔流玉環門對

葛洪丹井山老去腰鍊更垂釣時與漁樵相往還

戴良齋宅

嘉靖太平縣志縣治南宅前街宋戴少

監良齋宅於此

于恕宅

台州府志太平縣桃溪宋于恕遺址在焉

虞似良宅

台州府志太平縣橫溪宋虞司馬似良

寓居其上號橫溪真逸

戴復古宅

石屏詩集小傳復古字式之黃巖人所

居在南塘石屏山其父敏字敏才號東臯有東臯

集石屏之從孫昺號東埜有東埜農歌戴氏之名

於詩者蓋三世矣

太平縣志戴敏世居石屏山俗名塘下子式之因以為號戴敏

小園詩小園無事日徘徊頻報家人送酒來惜樹不磨修月斧愛花須築避風臺引些渠水添池滿移箇柴門傍竹開多謝有情雙白鷺暫時飛去又飛來

謹按戴敏有後浦園廬詩復古有姪孫子固東池隱居詩昺有次韻屏翁會芳小集詩此皆戴氏宅中之名也

盛象翁宅

嘉靖太平縣志元判官盛象翁宅在三

阮溪象翁生宋季從車玉峰游所居與聖水山近
遂尊之曰聖泉

赤城竒觀 方輿勝覽在郡圃後山上赤城志舊名
覽輝宋慶元三年守劉坦之建開禧元年守葉箋
更今名

桃源 名勝志在郡圃守黃嚳建循雙巖而上植桃
百餘倣劉阮故事也

黃嚳郡圃種桃詩本自深村
老圃來偶分符竹到天台漫

山幸可容桃李莫
待劉郎去後栽

嵐關 赤城志在通判廳雲海亭之右

梅榭 赤城志在通判廳之右其側有梅峽銀谷石
於菟峩眉嶺

彞洲 臨海記秦始皇遣徐福將童男女入海止於

彞洲

初學記臨海有彞洲
山頂有越王射的

鷺鷥林 赤城志在臨海縣開福院傍

陳白遊鷺鷥
林詩鷺行飛

起綠楊岸漁笛吹殘明月灘一片
畫圖收不得何人終日倚欄干

息菴 方輿勝覽州東南巾子山巔

赤山隱居

徐一夔赤山隱居記同郡胡宗衡讀書

赤山之下榜其所居曰赤山隱居

仙源

雲笈七籤黃巖縣有東西二仙源東源在縣

東北五里地仙劉奉林主之西源在縣南嶠嶺九

十里地仙張兆期主之

台州府志按杜光庭福地記東仙源在台州樂安縣

西仙源在台州嶠嶺樂安為今仙居縣而舊志皆從七籤云在黃巖即黃巖志亦然未知孰是

塲頭黃巖縣志在縣南五里世傳漢兵七十二陣

設於此劖地得箭簇之屬

小樊川 平過黃巖山水記在縣北六潭山朱文公
嘗著書其麓名為小樊川題曰溪山第一

遠菴 赤城新志在黃巖寧溪王氏建朱文公書扁
思菴 赤城新志在黃巖方山施氏建杜清獻書扁
松山林壑 陳耆卿松山林壑記丁君少雲幽栖之
所也東接海西接仙源

雪巢 尤袤雪巢記吳興林君景思寓居天台城西
之蕭寺榜其燕坐之室曰雪巢

碧西山房 萬厯仙居縣志在南峰下之黃村宋陳仁玉所構有松聲山陰濠上等名

冲菴 萬厯仙居縣志在縣南七里之前山宋處士郭磊卿別墅理宗御書冲菴二字賜之

讀書徑 名勝志在寧海縣西圃面水唐令薛抗建舊名風漪戎昱寄詩以出宰山水縣讀書松竹林為韻遂更今名

書林 崇禎寧海縣志在治廳東宋隆興二年令薛

抗建

松竹林 崇禎寧海縣志在治圃東下瞰官河宋慶
元二年令李知微建

丹丘 明一統志在寧海縣南晉孫綽天台賦仍羽
人於丹丘是也

浮門 輿地紀勝在寧海縣南土多陳姓蓋陳霸先
之後居於此

家菴 赤城新志在寧海縣西宋隱士王度建于有

成記

寓菴 崇禎寧海縣志在閩風里宋葉子由所築

梅花吟社 台州府志太平縣有梅花洞昔逸士林

原縉翁子實丘海何及邱鐔王禮何起直狄常程

完九人嘗為吟社號花山九老

陳彬題梅花吟社詩梅花洞口夾深

溪九老當年任品題今日青山不容隱五橋車馬聽驕嘶 按太平縣志林原縉作林元振

車路 台州府志太平縣南浦宋高宗南渡時於此

上車因名車路

銅柱 初學記臨海南三十里有銅柱乃漢疆場之表

銅塔 輿地紀勝臨海縣赤山絕頂有古塔塔之下

有石函盛小銅塔塔內有銀壺盛舍利相傳梁王

簪所施

台州府志塔高六寸重三十五兩內有十七字文曰吳越國王錢俶造八萬四千寶

塔乙卯歲記錢氏子孫與鐵券俱世守之

錢王鐵券 台州府志長一尺八寸三分濶一尺一寸厚一分五釐重一百三十二兩其文嵌金共三

百三十三字其畫皆內狹中寬

吳越備史 卷文維
乾寧四年歲次丁

已八月甲辰朔四日丁未皇帝若曰洛爾鎮海鎮
東等軍節度浙江東西等道觀察處置營田招討
等使開府儀同三司檢校太尉兼中書令使持節
閩越等州諸軍事兼閩越等州刺史上柱國彭城
郡王食邑五千戶食實封一百戶錢鏐朕聞銘鄧
騭之勲言垂漢典載孔懼之德事美魯經則知褒
德策勲古今一致頃者董昌僭偽為昏鏡水狂謀
惡貫汚染齊人而爾披攘亮渠盪定江表忠以衛
社稷惠以福生靈其機也氛祲清其化也疲羸泰
拯甌越於塗炭之上師無私焉保餘杭於金湯之
固政有經矣志契王室績冠侯藩溢於旂常流在
丹青雖鍾繇刊五熟之釜竇憲勒燕然之山未足
顯功厥有異數是用錫其金板申以誓辭長河有
似帶之期泰華有如拳之目惟我念功之旨永將

延祚子孫使卿長襲寵榮克保富貴卿恕九死子孫三死或犯常刑有司不得加責承我信誓往惟欽哉宜付史館頒示天下輟耕錄吾鄉錢叔琛氏贊乃武肅王之諸孫也嘗出示所藏鐵券形宛如瓦一角有斧痕蓋至元丙子天兵南下時其家人竊負以逃而死於難券亦莫知所在越再丙子漁者偶網得之乃在黃巖州南地名澤庫深水內漁意寶物試斧擊之則鐵焉因棄諸幽一村學究與漁鄰頗聞賜券之說買以鐵價然二人皆不悟其字乃金也有報於叔琛之兄者用十斛穀易得青趙復還誠為異事

錢王題梁 赤城續志在城兜率寺有廣順年間吳越王題梁

宋高宗御座 輿地紀勝臨海縣金鰲山善濟院高
宗航海至此有御座尚存

石碁盤 臨海記臨海縣王峴山本名黃石山相傳
黃石公居此有石碁盤尚存

仙人牀 台州府志在巾子山有石牀并枕可卧

桃都山桃木 輿地紀勝台州桃都山有大桃木上
有天雞日初出照桃木天雞即鳴天下之雞聞之
而鳴

天慶觀畫壁 赤城志州前天慶觀殿壁有范子珉
繪牛及來禽人傳其妙

鐵盤 黃巖縣志明成化間居民於海濱獲一大鐵
盤形如車輪重數千觔腹中鑄二十八宿及十二
生肖或曰朱文公治水利時鑄此以鎮水怪

天然石 台州府志在黃巖縣河埠朱文公大書天
然二字今徙置冠山

石馬跡 赤城志仙居縣項羽山相傳項羽少時駐

馬於此有石馬跡尚存

梁王山古松 赤城志寧海縣梁王山梁王寺側有
主簿洪皓祠前有古松盤偃結曲若虬龍然相傳
歷數百年陰蓋數畝雖畫工不能竟其狀宋紹熙
四年令方懋列亭其側

響石 崇禎寧海縣志在朱壘五里許以石扣之清
亮作磬聲相傳自唐以來有此移之他處則無聲
仍還故處則復響

淵明繪像 名勝志寧海縣北五龍山宋陶昭建書
室於山趾繪淵明小像於壁

朱文公遺墨 嘉靖太平縣志文公為常平使者經
營六閘夜宿洪亭長家有題壁二詩其一曰纔到重
陽氣便高雁聲天地總寥寥客懷今夜不能寐風
細月明江自潮其一題洪氏菊曰解印歸來歎寂
寥黃花難覓舊根苗祇因三徑荒涼後移向洪家
不姓陶至明洪宣間遺墨尚在

浙江通志卷四十六